

【档案史料】

乾隆朝贡监档案（下）

中国第一历史档案馆

按 语：明清时期，生员通过地方考选入国子监读书称为贡监，意为以人才贡献给皇帝，也称贡生。清顺治时期，贡监之制恢复，文人通过进入国子监读书有机会被授予官职，成为除参加科举考试之外的另一条入仕途径。由于清廷授予贡监的名义及选拔的方式各不相同，贡监分为恩贡、拔贡、副贡、岁贡、优贡和例贡六种。其中，恩贡、拔贡、副贡、岁贡、优贡又称五贡，被视为正途出身；例贡系捐纳而得，不属正途。贡监数量庞大，分布广泛，在崇尚科举的时代，并不引人注目，但他们是下层文人和绅士的主流，在社会中起不容忽视的作用。

现从馆藏宫中朱批奏折、军机处录副奏折、军机处上谕档中编选乾隆时期与贡监相关的档案，从中反映出贡监考选、入职、捐纳等实情，可供研究参考。

——编选者 哈恩忠

著贡监考职等项考试仍从午门朝考旧例并严加复试事上谕

乾隆九年十月二十八日

乾隆九年十月二十八日奉上谕：向来乡会试及考试生童俱在贡院，其余考取中书、笔帖式、誊录、教习及贡监考职俱在午门等处朝考。自雍正七年以后陆续改入贡院者，原为易于防范稽察起见，然文武乡会试派有内外巡绰员役防范周密，而今科乡试尚有怀挟、代倩种种弊端，其余考试又未便照乡会试之例多派员役搜查，伊等入场不过各归本号，并无稽察之人，转不若朝考有护军人等监看，可以除传递、代作等弊也。嗣后除文武乡会试并考试生童仍在贡院外，其余各项考试，著各该部查照从前午门等处朝考旧例办理，仍于取中之后再行严加复试。钦此。

著将陈奏国学不拘人数随收贡监等事之御史张孝捏申飭事谕旨

乾隆十一年七月二十三日

乾隆十一年七月二十三日奉谕旨：御史张孝捏以学校科举等事具折陈奏，朕临御以来，孳孳以作养人材为念，凡所以鼓舞振兴、诱掖奖劝，设立科条，亦既明且备矣。今览张孝捏所陈，皆属必不可行之事。如伊称天下贡监令国学不拘人数，随考随收。等语。夫聚天下之贡监于国学，无论势不能容，即教者亦何由而得遍为训迪。况到监之人原系随考随收，其在监肄业者，不可不加以分别，亦所以示鼓励也。至所称科举额数不必限定之处，尤属舛谬。朕因士子平日不能尽心向学，徒务科举虚名，以致文艺拙劣者混入其中，殊非激励之道。以斟酌再四，限定额数，庶免薰莸无别，而务虚名者知黽勉皆向实学也。况所定之额，大省中式举人一名，科至八十名，中省亦有六十名，

已不为少，若张孝捏所【奏】，则不论其人之能终场与否概令混入，则是等宾兴钜为儿嬉，力学者不知所劝，不向学者不知所惩，可以为乎？张孝捏所奏皆属分更定例，邀沽誉名，甚属不合，著飭行。折并发。钦此。

顺天府府尹蒋炳等为各省贡监即在本省送试事奏折

乾隆十二年二月三十日

顺天府府尹臣蒋炳、府丞臣孙灏谨奏，为奏明请旨事。

窃查各省乡试所设中额，原兼本省之生监，而向来学臣录取科举，亦将生监一体录送，此定例也。近闻各省学臣因科举名数少减，遂止于生员内录取，而贡监多有遗弃，其意以为贡监一途，原可赴京应试，殊不知京师之定有南北中皿，中额乃因国子监肄业之贡监生以及随任在京之人，遇大比之年不能回本省，是以准其在京应试，并非谓各省贡监俱应赴京应试，不得在本省乡试也。合天下贡监岂止数万，若尽驱之来京，不特无力者阻其上进之阶，即勉强进京亦多道途跋涉之苦。况京师贡院号舍在雍正十三年以前，原止八千三百余间，于乾隆元年添建，共足万间之数。今各省将贡监尽驱入京，必至万难容纳。本年八月乡试转瞬即届，拟合缮折奏明，伏祈皇上敕下各省学臣，将本省贡监与生员一体录科，择其精通三场者，即在本省送试，不得因科举名额少减，遂将贡监多有遗弃，庶士子无道途跋涉之艰，而京闈乡试办理亦不至周章矣。

为此，谨奏请旨。

（朱批）：大学士会同该部速议具奏。

著为副榜增额各省将贡监生员文理通明者送考事上谕

乾隆十二年五月初七日

乾隆十二年五月初七日内阁奉上谕：国家宾兴之典，原以遴拔进髦，若学殖荒陋者俱得厕名幸进，则玉石杂呈，主司因而迷目，自不可不严立限制。前此学臣科试之后，复取遗才。录遗之后，督抚又有大收。其取送甚滥，是以议有科举定额，每举人一名，大省录取八十名，中省录取六十名，小省录取五十名，其途本宽，果系真才，自不复有遗珠之叹。但近来士子因科场剔除旧习，颇知自爱，有志读书，期以实应，又当稍展其额，以示鼓舞作兴之意。朕思前议，但就正榜定额，尚有副榜未经议及，著再加恩，每副榜一名，大省加取四十名，中省加取三十名，小省加取二十名，令各学政于考试遗才时，不论生员、贡监，亦不据县分大小，但就文理明通者照数录送入场，此外概不许滥送。该部可即速行文知之。钦此。

革职留任湖北巡抚陈弘谋为请严贡监举优黜劣之例以端士习事奏折

乾隆十二年八月初四日

湖北巡抚革职留任臣陈弘谋谨奏，为请严贡监举优黜劣之例，以端士习事。

窃惟吏治首在维风，而欲正民风先端士习，圣朝重熙累洽，文教日兴，各处贡监生员林林济济，日益加增，作何稽查约束分别劝惩之法，所宜亟讲。除文武生员举报定例现在遵行毋庸再议外，尚有捐纳贡监生亦于雍正二年奏准归于学臣约束，照依文武生员一体举报优劣通行在案。乃自定例以来，各省多未遵行。湖北虽曾遵行，地方官均以无优无劣申复。臣等现在批驳飭查，俾令据实造报。窃查捐纳贡监一途，流品尤杂，要而言之，约有三等，有读书有志之士不能应科岁考试藉以图进取者，有止图顶带保守身家不敢为非者，亦有立心不肖希得护符在地方生事扰民者。就湖北一省，每年新捐监生不下一千余名，按年增加，比之生员，其数更多。平时既无科岁考试，不受教

官约束，未免妄自尊大，有私立旗杆俨然列于乡绅者，或欺压善良，或教唆词讼，或欠粮抗官，窝贼宿娼，一切败伦伤化之事皆所不免。现在事犯咨革者不少，及至咨革究拟，而本生已罹罪咎，地方良民亦受其害矣。湖北如此，他省大约相同。此种捐纳贡监，若果预为约束，严加稽查，或不致如此肆行无忌也。臣愚以为，约束稽查之法惟有遵照定例，举报优劣，俾善者有所劝、恶者有所惩而已。伏乞皇上敕下各省督抚、学臣，务遵定例，行令各州县官，会同教官，将所属捐贡监生平日加意稽查约束，将境内捐贡监生甄别优劣，秉公据实举报，如孝友力学、取与不苟、周贫睦族、劝人为善、止人为非之类，则为优；如不顾伦常、贪淫败检、欺剥穷民、抗粮包讼、武断把持种种干法纪等类，则为劣。优者必实有善可称，劣者必有恶迹可指，据实造报，候督抚、学臣按临，于赏罚生员优劣之后，将捐贡监生一并发落。优者奖赏，劣者责惩，并照举报文武生之例，明揭榜文，张挂通衢，不但本生荣辱攸分，或有举报失实，亦难掩众人公论。学臣三年任满，汇册咨送礼部查核，优者注册，劣者斥革，内有悔改向善者照例免斥，仍将姓名开注册内，以备查考。

再，定例报优之文武生员实行尤著之士，由廪生、增生应升入太学者，准作贡生，附生、武生准作监生，今捐纳贡监报优者，亦仿照优生之例，果有孝友端方、行谊尤著，学问又复渊通者，学臣会同督抚考试，于任满时荐生太学，给咨送部廷试，果其经明行修，准作岁贡，以示激劝。如无特出之才，宁缺无滥。倘州县教官举报优劣，或有徇情姑容、挟仇诬捏者，严行揭参；督抚、学臣失察，皆予议处。如此，则各省之捐纳贡监平时有教官之约束，有州县之稽查，科、岁两考有学臣之分别赏罚，不肖者有所惧而不敢为非，向上者亦有所冀而勇于为善，于民生风俗不无小补。

谨缮折具奏，伏乞皇上训示。谨奏。

（朱批）：该部议奏。

著为东省现行事例停止贡监封典照旧捐纳事上谕

乾隆十四年三月二十九日

乾隆十四年三月二十九日内阁奉上谕：年来因山东赈恤，支拨浩穰，金川军粮挽运繁重，陆续酌开事例，俾急公人员得展报效之忱。今东省年岁有收，金川大兵凯旋，经费而外并无急均需用之处，所有现行各事例应即停止。至捐纳有贡监、封典两项，于铨法原无妨碍，著照旧行。钦此。

山东巡抚准泰为东省改收本色贡监等捐谷各归州县等事奏折

乾隆十四年七月十一日

山东巡抚兼提督衔臣准泰谨奏，为谨筹监谷，改收本色，以裕仓储，仰陈圣鉴事。

窃照东省捐监事例，自乾隆三年钦奉上谕改归本省收捐本色起，至乾隆八年夏季止，仅共收谷一万四千余石，数甚寥寥，是以乾隆九年仰蒙圣鉴，特降谕旨，减二收捐，以期仓储充裕。诿值年岁节歉，报捐者仍属无多。且于十二年间被灾尤广，复于乾隆十三年正月二十二日钦奉上谕：山东省灾地既广，赈借繁多，捐纳贡监著停其在部收捐，俱归本省本折兼收。其捐本色者，准减二收捐，于该省积贮当为有益。钦此。又于乾隆十三年五月内经原任大学士高斌等以东省于乾隆十二年普被灾荒，一切赈济需费浩繁，奏蒙俞允，酌开东赈条例，以三年扣满，即行停止。其捐本色者各赴州县交纳，愿捐折色者赴布政司库交银，俟年丰买谷归仓，并准米麦、高粱一并收纳。复经部复，生俊捐监如纳本色者，每监生一名收谷一百四十四石。又于乾隆十四年三月二十九日钦奉上谕：东省年岁有收，金川大兵奏凯，经费而外并无急切需用之处，所有现行事例应即停止。至捐纳贡监、封典两项，与铨法原无妨碍，著照旧行。钦此。各等因遵行在案。

臣查收捐贡监，系我皇上为民足食圣怀，自期储积充盈，以臻实效。乃今行之年久，核其捐

贮，究属无多，不能用补仓额。臣身任地方，敢不鳃鳃计虑。除臣前于本年五月十六日于钦奉上谕，询问各省自改例以后，每年所收几何、生俊情形是否踊跃等因案内，已将前情恭折奏陈睿鉴外，兹臣复与布政使崔纪再四详筹，盖缘交银上库较之输谷上仓，无担负节扬之繁，原属简便易行，是以生俊报捐折色者多，而捐本色者少矣。况逢递年荒俭，粮价本昂，尤难重价购纳，此捐数之寥寥者亦势必然耳。今岁东省仰蒙圣主感召天庥，二麦既已遍获丰登，现在秋禾又皆茂盛，指日便可西成，各属米粮价值又复平减，迥非从前俭年可比，民间俊秀以急公而为贡监者自多。而我国家为民储食，其于仓廩尤宜多为积贮。臣请除捐纳、封典者仍听本折自便外，其捐贡监者俱令各归本管州县，照依上年部议减二之数，不拘米麦、高粱谷石报捐本色。其赴司库投捐折色者，一概停止。俾各属生俊咸以本地所产之粮输之本地，以为储备官仓，既可无需购运，俊秀亦免巢易之繁，殊为两便。倘遇一府之内或有丰俭不齐，许于该府属内通融报捐，但不许隔越本管府境，避昂就落，以致仓贮偏枯。臣仍督令该司道府等不时严察，如有不肖官吏需索刁难以及浮收斛面，臣即立时参治，以示惩戒。至收捐限期，请照上年五月内原任大学士高斌等原奏，以上年六月开捐之日起扣满三年，届期臣再查明所捐确数。如敷仓额，即请停止。倘有数多，即于采买案内扣价归库。设尚不足，另行酌核具奏请旨。似此稍为变通，则仓储科望日盈，于急公报捐之生俊仍多利便。

是否可采，臣谨恭折请旨，伏乞皇上训示遵行。谨奏。

（朱批）：军机大臣会同该部速议具奏。

江南学政李因培为严催各属造具贡监生员细册迟延事奏折

乾隆二十二年四月初五日

臣李因培谨奏，为请旨事。

窃照捐纳贡监，定例归于学政约束，江苏一省较诸他省为多，伊等自以名列成均，教官难于管辖，而地方有司又视同隔膜，不加教导，迨经犯案，始行详究。至举报优劣，定例昭然，然各省奉行已久，独江苏未经举行，以致伊等罔知顾忌。查生员岁、科两试，衡文考行，按籍而稽，贤否易辨。至捐纳贡监，在部及各省援例不过陆续知照本籍，文移零星，事例错杂，不如生员必有学册可据。况学政衙门惟由生员报捐者始据申报开除，其由俊秀投捐者率皆无凭查核，是其姓名、籍贯尚然莫别，何能查访甄陶，以收实效。臣自抵任后，加意密访，其中武断把持、荡逾检闲者殊不乏人，迨批革发审，转须檄飭州县，查明事例年分，乃可追照咨革，往返延捺，纪纲倒置，无惑乎？视功令如弁髦也。检查旧卷，自前学臣张廷璐任内，即通飭各属，将新旧捐纳各生造具细册申报，历任学政亦皆檄催。无如州县官惮于造报，迄未申复，二十年来，尚无底案。平时既少稽查之据，迨录科考遗，遇有捏名顶冒，弊端尤难厘剔。至于作奸犯科、徇情袒庇，的名既学政所未知，则疑似亦非教官所敢报。臣于上年春间即移会抚臣，通飭举报优劣，并令造具总册送查，仍牒移教官存案。经今一载有余，送到者仅一二属，余皆频催罔应。似此疲玩怠废，积习已深，若不定以参处，事何由集？相应奏闻请旨，将造送迟延之地方官再限文到一月后，如仍不造报，容臣分别查参，照造册迟延例送部查议，庶怠玩之习可挽。至举报优劣，倘有徇隐不实，别经发觉，亦许查参。如此，似于学校有益。

是否有当，伏祈皇上训示遵行。臣谨奏。

乾隆二十二年四月初五日奉旨：依议。钦此。

户部左侍郎刘纶等为严查贡监生员冒籍大宛两县造册申报事奏折

乾隆二十二年六月初二日

臣刘纶、臣熊学鹏谨奏，为敬陈管见，仰祈圣鉴事。

乾隆二十一年闰九月内，九卿议复御史范械士条奏清查冒籍一折。内称所有顺天乡试未经中式之贡监、生员，责令该督、顺天学政、府尹，令各地方官及各学教官详查，以部文到日勒限一年查明冒名冒籍者，悉令改正。等因具题。奉旨：依议。钦此。钦遵在案。除生员一项听顺天学政查办外，其贡监生臣衙门接准部文，随即严行各州县卫彻底清查去后。现据京外各州县卫陆续查明申报，惟大、宛两县详称，遵查历年新旧报捐贡监，其中多属南人，查传不啻再三，现在呈请改归者寥寥无几。其余茫无影响。等语。臣等查大、宛两县，乃京畿首邑，五方杂处，去来无定，非若外州县卫地方，孰为土著，孰为寄籍，挨户即能清查者可比，所以历年报捐之贡监，大、宛两县不下千有余人，而自首改归者不过数人。该生散处于外，观望延挨，不肯自首，虽部文内定有勒限一年之语，其实一年后必俟冒籍事发始行处分。其未经发觉者，在地方官既不敢定其为土著之人，又不便遽以冒籍呈报。日久因循，势必复成故套，弊端百出。臣等伏思，此项贡监，如果实系土著，何至亲族子弟全无、坟墓庐舍莫考？即使游学在外，自上年九月部复行知，迄今为时不为不久，屡经地方官宣传，岂竟毫无知觉。伊等既已冒捐贡监于先，又复诡秘踪迹于后，蒙我皇上天恩，不即治罪，宽以限期，令其自首，复不知感激呈明，殊属可恶。查此次限期，以本年九月为满，请于九月以前令大、宛两县将土著者若干及冒籍呈首改正者若干，按名造册申报臣衙门，汇具总数奏闻。至凡查无踪迹并不首明之人，则皆实系冒籍无疑，不必俟其另案发觉问其原籍何处，请概行斥革，以清弊端。

抑臣等更有请者。各省捐纳之人有指称大、宛两县籍贯赴部报捐者，在户部据呈准捐，行知该县遵照，不能察其是否冒籍。在大、宛两县，亦止凭奉部行知之文照例注册，并不知为何省何县之人，从未见有查一冒籍申报，其用大、宛两县籍贯在外省报捐者亦然。此次奉旨清查之后，臣等愚见，与其稽查于事后，曷若慎重于事先，请将来报捐贡监生，凡有用大、宛两县籍贯者先令该生在县呈明，该县查其委系土著，一面申报臣衙门查核，一面出具印结令本生持往具呈，始准报捐。如无该县印结者，一概不准。倘有实系土著之人，该县官吏借端需索勒捐不肯出结及徇情受贿滥行出结等弊，臣衙门就近不时查参，严加治罪。如此，则冒滥之弊可除，而于政体庶为允协矣。

此臣等冒昧之见，是否有当，伏乞皇上睿鉴训示施行。谨奏。

（朱批）：大学士、九卿议奏。

大学士傅恒等为议复贡监考职甄别候选以汰衰冗而收实效事题本

乾隆二十二年九月三十日

（文字模糊，故略——编选者）臣傅恒等谨题，为请定甄别候选之佐杂，以汰衰冗而收实效事。

内阁抄出湖广道监察御史刘宗魏奏前事内开，窃照州同、州判、县丞、主簿由贡监生考职，挨次铨选，归双月选用，必二三十年始能得缺。此项人员在籍候选，需次既久，内中率多年力衰迈者，虽定有督抚验看给凭，如系老病不能胜任听督抚扣凭咨部另选之例，然与其验看于临时，即果秉公扣除，而咨选周折，其缺悬宕，为时已久，设使再选再扣，更淹时日。倘或督抚稍存姑息，怜其已得之功名，不忍遽夺，听其支离赴任。而该员之筋力迟暮，志气昏惰，实已不堪驱策，地方难望助理，于备员任使之道所关匪浅。乾隆二十一年钦奉上谕，直省督抚于佐杂亦宜加意厘剔，仰见我皇上整饬吏治惠爱民生之至意无微不到。臣愚以为，凡贡监考职，在籍候选人员应酌截年限，行令督抚逐加验看甄别，造册送部。其年力精壮者归班铨选，年力衰迈者注册停选。吏部于铨用将完之时，行文直省，再行截年甄别。永著为例。如此，庶铨法疏通而佐杂亦皆得人。臣愚昧之见，是否有当，伏乞皇上睿鉴敕部议复施行。谨奏。等因。于乾隆二十二年九月初六日奉朱批：该部议

奏。钦此。钦遵。于本月初九日抄出到部。

该臣等议得，湖广道监察御史刘宗魏奏称，窃照州同、州判、县丞、主簿由贡监生考职，挨次铨选，归双月选用，必二三十年始能得缺。此项人员系在籍候选，需次既久，内中率多年力衰迈者，虽定有督抚验看给凭，如系老病不能胜任听督抚扣凭咨部另选之例，然与其验看于临时，即果秉公扣除，而咨选周折，其缺悬宕，为时已久，设使再选再扣，更淹时日。倘或督抚稍存姑息，怜其已得之功名，不忍遽夺，听其支离赴任。而该员之筋力迟暮，志气昏惰，实已不堪驱策，地方难望助理，于备员任使之道所关匪浅。乾隆二十一年钦奉上谕，直省督抚于佐杂亦宜加意厘剔，仰见我皇上整饬吏治惠爱民生之至意无微不到。臣愚以为，凡贡监考职，在籍候选人员应酌截年限，行令督抚逐加验看甄别，造册送部。其年力精壮者归班铨选，年力衰迈者注册停选。吏部于铨用将完之时，行文直省，再行截年甄别。永著为例。如此，庶铨法疏通而佐杂亦皆得人。等因具奏前来。查向例，贡监生考职，分别等第，授以职衔，归于双月选用人员四选一升之内选用一人，州同、州判赴部投供候选，县丞、主簿、吏目在籍候选。乾隆元年七月，臣部议复监察御史夏之芳条奏恩、拔副榜贡生考职州同、州判、县丞，俱令在籍候选，遵行知照在案。此项考职人员，因需次得缺较迟，其间或有年力衰迈以及丁忧缘事各项事故，是以臣部向来办理查其将次选用，俱先指名开单，行文各督抚详查报部，方准铨选。选授后，将文凭封发，复令各该督抚验看该员有无假冒、是否衰迈，然后给凭赴任。如系衰老不堪供职，听督抚扣凭，咨部另选。是原不任令该员等冒滥铨选，听其支离赴任也。惟是一应考职人员选期既远，而迟速更有不同，其中不无选授给凭后验看不能胜任之员，是咨部另选悬缺淹留在所不免。诚有如该御史所云，验看于临时，不如甄别于先时者也。查考职县丞、吏目二项，或每年可选一二人不等，惟考职州同、州判、主簿三项，缺少人多，州同、主簿约需十余年方选一人，州判五六年方选一人，虽数年指名查取一次，其去得缺之期为时尚远。现选各员俱系康熙五十年以前考职之员，该贡监生即系青年考职，迨按班轮选，已经四十余年，大率年力衰迈，难供驱策者居多。若仅照该御史所奏，截年甄别，尚于铨政无补。臣等酌议，请将康熙五十年以前考职人员给以顶带，不准选用，毋庸验看，其自康熙五十一年以后考职贡监生，臣部核其选用之多寡迟速，州同、州判、主簿各指名截取十人，县丞、吏目各指名截取二十人，开单行文各该督抚、府尹详悉验看，严加甄别。如系年力衰庸及自揣龙钟不能任事者，即行咨部停选，给以顶带注册。其年力精壮堪供任使并无别项事故者，即行造具实在年岁清册，并取具该地方官印甘各结，送部照班挨选。倘有假冒顶替、年貌不符，该地方官混行出结，该督抚、府尹验看不实，一经察出，照例议处。如咨取人数，其中并无年力堪用之员，亦即报臣部另行截取。在各督抚、府尹既便于详慎甄别，而铨政亦得疏通矣。

恭候命下，臣部遵奉施行。臣等未敢擅便，谨题请旨。

（批红）：依议。

江苏学政李因培为遵旨查参捐纳贡监造册迟延各员等事奏折

乾隆二十二年十二月十一日

总督江苏学政臣李因培谨奏，为汇奏事。

窃照江苏捐纳贡监造册迟延一案，历任学政行催，置若罔闻，经臣于本年四月初五日在徐州府行宫具奏，请再限一月内，如仍不造送，将不行造送之地方官查参，照造册迟延例处分。等因。奉旨：依议。钦此。钦遵。即经行司飞飭各府州去后。嗣据各属陆续造册申送齐全，查册内仍有遗漏及无年貌三代者，恐滋顶冒。经臣逐一摘出，驳令补造。今驳查之案虽未遽复全，而事例姓名册已备，合计下江六府三州所属内逾限不及十日者毋庸置议外，所有逾限一月以上之山阳县知县胡昕

耀、盐城县知县李世保，逾限二十日以上之署宝应县知县·同知嵩龄、接任知县吴昌、宿迁县知县傅果，逾限半月以上之署泰州知州李世杰、兴化县知县李交、邳州知州冷时松，以上八员相应遵照谕旨查取职名参奏。

至该员等俱据各该府确查声明，或因查灾远出，或正署交代，延迟有因，应否交部查议之处，恭候皇上训示。其余各属均已依限造送。臣亲酌定规条檄发，使一切有所稽考，不至仍前漫无头绪。合并陈明。仰祈睿鉴施行。臣谨奏。

乾隆二十二年十二月二十四日奉朱批：可宽其初过，若再因循，参奏可耳。钦此。

江苏布政使托恩多为请减贡监捐数以裨灾地仓储事奏折

乾隆二十二年十二月十二日

江苏布政使臣托恩多跪奏，为请减贡监捐数，以裨灾地仓储事。

窃照江苏省生俊捐监，乾隆三、四年间粮价因灾高昂，经督抚二臣先后奏请通省一例本折减三收捐。停止之后，于乾隆七年，督抚二臣以淮、徐、海三属灾后仓储不足，奏准减三收捐，他属生俊亦准赴捐，米谷粟麦兼收，至八年夏季停止。乾隆九年钦奉恩旨：各省俱准减二收捐，每谷一石酌以六钱计算，于本地交纳本色。钦此。江省亦一概减二收捐。乾隆十二年，前抚臣安宁因谷价较昂，请于减二之外，再量减五分，并捐贡一条请停部捐折色，奏蒙俞允钦遵。十四年八月，部议停止。十八年，经督抚二臣会奏，暂开江赈事例，内生俊捐监请仍照十二年减二、五之例收捐本色。于二十年三月，前抚臣庄有恭奏停官生报捐，止准捐监，交纳本色，通省现在减二、五收捐。臣伏查，淮、徐、海三属频年赈恤巢借，仓储空虚。今年被灾，钦沐圣恩，截漕接济。奴才又陆续拨运成熟州县仓米，止敷赈用，不能兼资来年平糶。已经详明督抚二臣，通飭成熟各州县动支节年巢价，于丰稔地方采买补仓，以备拨济在案。惟是淮、徐、海乃积歉之区，元气未能骤复，上廛霄旰忧勤，如伤在抱，既已蠲缓抚赈有加无已，复将水利河工克期并举，又敕督抚二臣酌调守令，以期绥循培养。恩膏优渥，训谕周详。臣任职承宣，分宜仰体圣心，凡可为此方请命者，何敢因循缄默。臣就目下各属仓储，权其缓急，更易淮、徐、海为先，因时调剂，固非官买不可，而捐监本色亦可以补不足。奈江省自减二、五收捐以来，各府州粮价不能大减，淮、徐、海至今尤为昂贵。且有并准部收折色之例，以致捐纳本色者寥寥无几。臣愚昧之见，江苏松常镇扬太道八府州减二、五收捐本色，应仍其旧。其淮、徐、海三属，仰乞皇上格外天恩，俯准暂照七年减三之例，并照十二年增添捐贡一条，收捐本色。又每谷一石例收耗谷三升，仓费银四分，纸张、饭食公费一分五钱，请各减半核收，以资耗费。江省隔属生俊愿运本色赴捐贡监者，悉照减三投捐，粟麦兼收，仍照向例，江省贡监概停部收折色及赴外省报捐，一俟淮、徐、海粮价平减，仓储有备，酌量情形，据实另奏，仍照减二、五办理。如此，庶淮、徐、海减三既与通省不同，其耗费减半，则隔属生俊又可藉为运脚之需，各生俊感沐天恩，投捐自必愈加踊跃。此系各出有余以输之官，于市价无碍而于灾地仓储甚有裨益。

奴才为因时因地起见，不揣愚昧渎奏，如臣言可采，伏求皇上特降谕旨施行。谨奏。

乾隆二十二年十二月二十六日奉朱批：该部速议具奏。钦此。

江苏学政李因培为请厘贡监籍捐之籍贯以杜冒考事奏折

乾隆二十三年三月初十日

江苏学政臣李因培谨奏，为请厘籍捐之籍贯，以杜冒考事。

窃查入籍定例，二十年以上有田产庐墓者方准应试，其寄籍地方虽有田庐而实系有籍可归者，

令地方官彼此关会，拨回原籍考试。如实系无籍可归者，方许应考。又捐纳定例，凡生俊吏员人等报捐，查明实系土著，果有房产、亲族、眷属可凭，与例相符者，取具里邻地保甘结，始准结送。各等语。是以各省考试，无论隔省隔属之人，必确与例符者，地方官始行详准入籍与试。其捐纳贡监，若在本省报捐，必先具呈有司，倘系寄籍，无难查出。惟在部及各省报捐俊秀，不过开呈籍贯、履历，投递户部及各该衙门收银给照，其中颇有舍其祖父之本籍，改就现在侨居店业者之籍，朦混投捐，径行知照者。在该地方官奉文后，以贡监非比童试，不论与入籍年例是否符合，不加确察，一概注册存案，迨伊等子弟出考，转以父兄捐纳之籍持为铁据。按之定例，实为不符，而执照现存，颇得藉口。其弊皆由在外捐纳，无从查照故也。至上江徽州之人，商贾所至，立业成家。其在下江地方者，比比皆是。上下江原属一省，是以扬州商籍止淮西商子弟应试，不准徽商赴考。盖以道路非遥，尽可回籍童试。其或捐纳贡监，则同一江宁省闾，自不必别占寄籍。乃近年以来，徽人之贸易下江及行销浙盐于下江者，亟为置田买宅，预伏子弟入籍之根。凡各属详请入籍，率皆徽人，而在京及各省捐纳贡监填报寄籍地方者，亦日益众。是伊巧为入籍，殊于功令有违，自当立法稽查，以遏其渐。臣请嗣后在部及各省报捐贡监人等，除本系的籍外，凡有原籍而现寄籍他处者，令本生呈内声明原籍及寄籍年分、田产庐墓坐落，一面收捐，仍将所呈于文内知照该籍，查取里邻地保确结申报。如年例不符或虽有田庐实系有籍可归，地方官即据实查报，咨改原籍，不得因其已经上捐朦混注册。如投捐时不即呈明知照，经地方官查出，本有原籍及各项违碍情弊，径详咨革。倘地方官扶同率结，别经发觉，照滥行出结例议处。至徽郡之人在下江地方贸易者，除挈家远迁人经数世置产多年仍照各省入籍例办理，内有从前原以寄籍报捐贡监一概查明，如系侨居店业年例不符有籍可归者，不准仍留寄籍，即改归徽籍，详咨换照，以杜伊子弟冒考。其徽人行销浙盐，所在原系本省地方，与扬商无异，况在浙现有商籍可考，请一概不准入籍应试。内有从前原以寄籍报捐贡监，并即查明改归徽籍换照，以昭画一。

是否有当，臣谨缮折具奏，伏祈皇上敕部议复施行。臣谨奏。

（朱批）：该部议奏。

革职留任山西布政使刘慥为请严冒滥捐纳贡监及职衔以重名器事奏折

乾隆二十三年十一月二十四日

山西布政使革职留任臣刘慥谨奏，为请严冒滥捐纳，以重名器事。

窃查暂开捐例，以广急公登进之阶，为地方民生之益，凡捐纳官生均宜身家清白，如有出身不正，例应查究。第投捐之际，据呈收捐，原无从考其根底，迨既捐之后，在应行掣选人员，例由地方官出结送部，尚可稽查。惟仅捐佐杂职衔及贡监等项，无关铨选，不过行文知照本籍，不令取结，虽贡监于四季造册报部之时间有将印结并送者，而各省或有或无，办理不一，地方官亦视为具文，并不实在确查。至于捐纳职衔之人，尤向无取结报部之例，是以州县因无关系，多不留意。而此等人内，往往良贱莫别，居然顶带荣身，俨与士夫无异。如上年臣在河南任内，查有皂隶更名捐监，业经具详斥革。今晋省亦有革退差役冒捐州同，亦经详情抚臣咨革在案。臣伏查娼优隶卒及曾经犯罪问革变名易姓侥幸出身者，定例不准考试，则捐纳事同一例，职衔虽属虚名，阶级总无二致；贡监虽非官爵，姓字亦列成均，岂可使污贱之流漫厕衣冠之列。臣请嗣后，凡由俊秀捐纳贡监及捐职衔之人，收捐之后行文本籍，概令地方官查明，如果身家清白出具印结，贡监仍随四季册送部；捐纳职衔者，亦于年底汇行报部，官吏亦不得藉端勒捐需索。设有出身不明不正，如优伶、奴隶及过犯革人等混冒捐纳，即行详革。倘地方官不确切查明，或徇隐出结，别经发觉，除本人斥革治罪外，将滥行出结之员照例参处。庶地方官有所责成，自必详加查察，而官生之内不致薰莸混

杂，于朝廷名器益昭慎重矣。

臣不揣冒昧，恭折陈奏，伏乞皇上睿鉴训示。谨奏。

（朱批）：所奏是。该部议奏。

安徽巡抚高晋为奉部文停止安省已收捐本色贡监数目事奏折

乾隆二十四年五月二十一日

安徽巡抚臣高晋谨奏，为奏明事。

据布政使托庸详称，安省收捐本色贡监事例，于上年三月内奉准部文概行停止，因各属奉文先后不一，其有已经报捐者，未便阻其急公，当经详奉咨明，截至春季底为止在案。兹查自乾隆二十四年正月起到三月底停捐止，共收谷并米麦折谷一十万二千九百八十二石八斗，理合造册详请奏咨，并声明各生俱未奉停捐以前投纳，因送拨仓收填写舛错，往返驳换，是以详报捐迟。等情前来。臣查安省仓储无多，钦奉上谕俯准生俊折捐本色，又经臣奏明，将凤、颍、泗三属照淮、徐、海三属之例增添捐贡。嗣于乾隆二十四年三月内接准部咨，江省收捐本色概行停止，咨准部复，截至春季底为止。各在案。查自乾隆十九年闰四月内收捐起至乾隆二十三年年底，共收谷并米麦折谷二十四万五千五百三十四石四斗，俱经臣按年分晰奏报。今自乾隆二十四年正月起到三月底停捐止，共又收谷并米麦折谷一十万二千九百八十二石八斗，连前总共收谷并米麦折谷三十四万八千五百一十七石二斗余，将节年收捐粮石飭司督令各属加谨收贮，并将新收粮石造册咨部外。

所有安省自收捐起至停捐止收过本色粮石数目，臣谨会同两江总督臣尹继善恭折具奏，伏乞皇上睿鉴。谨奏。

乾隆二十四年六月初九日奉朱批：知道了。钦此。

广东布政使史奕昂为逐一查明鹤山县贡监拨回原籍应试事奏折

乾隆二十七年七月十一日

广东布政使臣史奕昂跪奏，为奏闻事。

窃臣自上年三月抵任后，适各武举请咨会试之时，当查有肇庆府鹤山县武举胡元鼎与广州府顺德县武举胡元鼎姓名相同，随即飭发广州府严行提审，究出顶冒实情，详请咨革定拟，并经臣奏明在案。第查鹤山县系雍正十年新设，其时广州府属民人共一百五户情愿建城入籍，奉部议准筑室垦荒、住耕应试，詎各该户并不移居耕种，惟遇学政按临，文武各童辄于广、肇两处重考，致有一名两试情事。近因清查冒籍，经学臣郑虎文彻底严查，将百五户文武生员共八十九名，奏明拨归广州府属之顺德、新宁等县各原籍肄试，弊窦已为肃清。惟是生童既经清理，贡监亦事同一例，兹现届乡试，所有百五户各贡监亦应改归原籍申送考试，但场期伊迩，若候咨明改拨始准送考，未免稽迟时日，有误试期，是以现据监生潘凌汉、潘凤翔等呈请改归应试。等情到臣。臣即批行鹤山县，飭令移查有无丁忧事故即申送考试，一面将百五户各贡监逐一确查，造册详送，以凭转请咨明，拨回原籍，毋许仍留鹤山县，致启日后前引混冒情弊。如此，则生监之办理统归画一，而冒滥之积弊可以永除矣。

所有臣办理缘由，理合恭折奏闻，伏祈皇上睿鉴训示遵行。谨奏。

（朱批）：知道了。

江南安徽巡抚托庸为议复安省修葺城垣需费浩繁开捐贡监及职衔等事奏折

乾隆二十七年十一月二十九日

江南安徽巡抚臣托庸谨奏，为遵旨议奏事。

窃臣托庸于乾隆二十七年八月二十七日接准督臣尹继善移咨大学士·公傅恒等字寄内开，为遵旨议奏事。安徽巡抚托庸奏请于安省开捐贡监暨职衔等项以为修理城垣之费一折，奉朱批：军机大臣会同该部议奏。钦此。据称，现在安省应修城垣系怀宁、桐城、潜山、太湖、宿松、徽州府郡城、歙县、祁门、黟县、南陵、泾县、旌德、太平、贵池、青阳、铜陵、石埭、建德、束流、当涂、繁昌、合肥、巢县、寿州、凤台、定远、霍邱、霍山、和州，共城二十九座。查乾隆二年原估共银三十五万七千有零，今隔二十余年，内有续圯增估共需银八十万四十两零。安省每年匣费三万两，除额支动用外，所余仅二万两，若照例动匣费兴修，实属修竣无期，惟有援照减二五捐监之例，暂请开捐监生。惟城垣需银甚多，若止捐监，恐难捐足八十万两之数，并请照豫赈条例，有已未满足吏员捐职荣身，又农民捐顶带及现任候补各官加捐纪录之条，似应援例，准于本省一并在司库收捐折色。再，各府州县内不必拘定本籍，但有情愿报捐之人，亦可于别城报捐，并请嗣后如有好义急公之士，听其呈明布政使，准其一体捐修，工完计其捐资多寡，分别奖励，更于公事有济。庶安省应修城垣得以一律完固。等语。查修葺城垣，本以卫民，以本省民力之有余，充本省卫民之公用，事理自属可行。今安省城垣圯颓至二十九座，理宜急筹修葺，然若不通盘筹画，必待按照成例陆续兴修，则旷日持久，坍塌愈甚，需费益多，不但耗敝物力，亦且修竣无期。即如该省应修各城，从前原估不过三十余万两，今隔二十余年，已需银八十万两，较前多至加倍有余。如再不乘时一律兴修，逐渐加增，何所底止。该抚所奏议请于本省开捐贡监，吏员、农民等顶带荣身及现任候补加捐纪录各款，并好义急公之士听其呈明藩司准其捐修，工完计资奖励等条，即系仿照从前乐善好施之例，既有裨于公事，亦无碍于铨选，应如所请行。此例开设之后，如果报捐人数众多，群情踊跃，该省城工竟可次第兴修，并将此例通行各省，遇有坍塌城垣较多省分，均令该督抚陆续具奏请旨办理。但现在安省应修城垣为数太多，所需银两浩繁，该抚所开各府州县内有地方富庶商贾辐辏者，报捐士民自应较多。至如山僻小邑，未必尽能比例。诚有如该抚所称，恐本省报捐无多不能足数之虑。查从前好善乐施例，其踊跃急公之人俱系临时听其自愿输将，不能先期算定于经费若干之内，设或定义一律兴修之后，而报捐银数无多无补于事，仍属竣事无期，又非通盘筹画妥协办理之道。该省实在情形，臣等未能深悉，不便悬揣，应令该督会同总督尹继善再行详悉商酌，妥协定义具奏。是否如此，伏候训示。谨奏。乾隆二十七年八月十二日奉旨：依议。钦此。

臣尹继善、臣托庸会同悉心筹议。伏思军机大臣会同部臣所议，现在安省应修城垣为数太多，所需银两浩繁，好善乐施之例俱系临时听其自愿输将，不能先期预定经费若干，设或定义一律兴修之后，而报捐银数无多，仍属修竣无期，诚为慎始虑终之道。臣等查，城垣保障原以卫民，民力有余亦当自卫。今臣等察看安省情形，户口殷繁，田土肥沃，自我朝重熙累洽，历圣相承，惠爱黎元，教养备至。又蒙皇上深仁厚泽，蠲复频施。数年以来，秋收屡获丰稔，家有盖藏，照好善乐施之例，劝令地方富户商贾士民量力之厚薄修葺城垣，实以民力之有余充卫民之公用，理应向风慕义，踊跃乐从。臣等正在会议间，有徽州府知府王尚湄禀称，据该属歙、休、祁、黟等县士民公同具呈，愿将该府通属城垣自认全修，并遵好善乐施例约共再捐银十六万两，为通省各城修理之用。其余徽籍扬商因道路遥隔，尚未呈捐到府。合之陆续具呈并将来捐贡监各条，银数自尚可倍于此时捐数。等语。并据和州、怀宁、合肥三州县士民均具呈情愿捐修到臣。臣等看其愿捐呈词，似出于诚心，并无勉强之意，谨将各呈恭缮，以备御览。至恐山僻小邑捐数无多，臣等拟将无碍铨选款项

酌添数条，同前奏捐款另折恭呈睿鉴。其凡有外省民人在安省为商及士宦者，俱准其就近一体于藩库报捐，将来即可以藩库收捐之银为僻地不敷之用。其中如有急公好善所捐之数竟能盈千累万逾于应捐职衔者，应酌加顶带，给以大衔。恭候皇上训示。如此办理，似可有济钜工，各处城垣渐可巩固。倘虑安省应修城垣多至二十九座需费浩繁，将来捐项之能否充裕究不能先期预定，不妨于开捐劝捐之后缓期试看，如果为数无多不能兴举，彼时再行酌议另奏请旨办理。

所有臣等察看安省现在情形，理合会折复奏，伏乞训示遵行。谨奏。

（朱批）：原议大臣议奏。

大学士傅恒等为议复安省怀宁等州县修葺城垣开捐贡监及职衔等事奏折

乾隆二十七年十二月十六日

大学士·公臣傅等谨奏，为遵旨议奏事。

两江总督尹继善、安徽巡抚托庸会同酌议捐修城工条款一折，乾隆二十七年十二月十三日奉朱批：原议大臣议奏。钦此。据称，云云等语。查安河每年匣费银三万两，原系储备修城之用。前据该抚托庸以怀、桐等州县应修城垣二十九座共需银八十万四千两零，若照例动支匣费兴修，实属竣事无期，奏请援例于本省开捐贡监，并照豫省条例收捐吏员、农民顶带及现任候补加捐纪录各条，业经臣等议复准行。并恐报捐银数无多不能竣事，行令该督抚再行详悉商酌，妥协定义，具奏在案。今据该抚等察看情形，业据休宁、歙县、黟县、祁门并和、怀等州县，士民呈请捐修银十八万余两，所在乐从，具见踊跃。该抚等犹虑山僻小邑捐数无多，复于前奏捐款之外酌添贡监，武生俊秀捐纳职衔，以及文武进士举人、生员贡监等缘事捐复，并南漕武举捐纳开复五款。所捐银数，臣等查与现开豫工事例捐款俱属相符。统计前后八款，均系无关轻重，与现行豫工捐例可以并行无碍。应如所请办理。至捐纳贡监及顶带封典等款，援照从前减二五事例，并请每谷一石折银五钱计算之处，查江省捐纳贡监自乾隆九年减二收捐本色，嗣后凡遇收捐折色俱照减二之例，每谷一石折银六钱计算。迨至乾隆十二年，该省米价昂贵，经前抚潘思渠奏请减二五收捐贡生，是减二五收捐之例原属因时酌减，并非定例。今若照该抚等所请，未免过优，且与现行豫工条例不符。应令该抚仍照江省减二本色事例，每石六钱核计收捐。再，贡监既不便援照减二五之例，则农民捐顶带项下封典一条量减二五之处，亦毋庸议，应仍照定例报捐。以上各款，除本省报捐外，凡有外省民人在安省为商及仕宦者，俱准其一体于安省藩库报捐。其中如有急公乐输所捐之数逾于应捐职衔者，悉照好善乐施之例，临时分别银数多寡，奏请议叙。仍令该抚将休、歙等州县捐修银两酌量紧要工程，先行次第兴修报部，俟报捐足数，即行奏请停止。统候命下，行文该督抚遵照办理可也。

为此，谨奏请旨。

著江浙等四省贡监收捐本色之例停止事上谕

乾隆二十八年九月二十五日

乾隆二十八年九月二十五日内阁奉上谕：托庸奏江浙等四省现议贡监收捐谷石运补京通仓贮，请将安省常平谷一百六十余万石先行碾米分附粮艘带运一折，虽其酌剂积储，颇见勇往，然朕熟筹此事于仓庾民食实在有无裨益情形，即九卿复准侍郎英廉条奏，本案并可无庸亟事举行也。陈编所载余三余一文固为足食本计，第在当时原属地旷人稀，又列国各守其封城，持筹者可以随宜措置耳。以今幅员之广、生齿之繁，岁即屡丰，而三农生谷只有此数，采购于官庾，捐输于绅士，条款虽殊，其为地方所产则一，与其辗转挹注名异实同，又何如即以此留之民间，俾饔飧倍为饶给乎。朕御极以来，曾议直省仓贮宽裕买补，旋闻市价增长，即令停罢，盖以小民未获将来巢穴之利，而

先受目前食贵之艰，譬诸日资四鬴者先夺其一二，而语之曰吾将为尔他日待哺计也，彼不生感而生怨矣。此中先后得失，其理较然不爽。况朕念切民依，偶值偏灾即截漕，动以亿万计，而年来粮艘正供自足，太仓之粟可余备二三年而赢，此亦足矣。计臣即颉颃较量，朕皆不以为然。国家升平富庶，内府外府均为一体，凡官廩兵糈岁支之数岂阙于供？若以补漕粮而议捐谷，又因议捐谷而先运常平，不独徒费输挽之劳，且他省闻风踵事，地方因缘垄断，必致米价踊腾，闾阎转滋弊累。即云不动声色，似此多立规条转相仿效，其为声色更何待言。揆之经常不易之道，惟为民食留其有余，国用自无不足。居今承平日久，户口增而产米只有此数，倘民间或遇必资通融协济之处，亦不过临时善为补偏救弊耳，无他一劳永逸之计也。至执三十年制国用之说，拘文牵义，更制而事不可行，譬之封建井田诸旧法，又岂可复议于今日哉。所有托庸碾运常平谷石之奏不必行，其江浙四省贡监收捐本色之例并著停止。将此通谕中外知之。折并发。钦此。

江西巡抚明德为议复江西捐纳贡监折收本色及补运截漕等事题本

乾隆二十八年十月十六日

兵部侍郎兼都察院右副都御史·巡抚江西等处地方兼理军务兼提督衔臣明德谨题，为筹备天庾，以重本计事。

据江西布政使司布政使富明安详称，奉本部院案验内开，乾隆二十八年八月十一日准户部咨开，湖广司案呈，该臣等会议得，内阁抄出户部左侍郎英廉奏称，窃查京师为四方都会之地，仓粮积贮常欲充盈，向来每年漕运所入，除在京俸饷之外，例不别项轻支，凡以国家本计所关，总期有增无减。我皇上崇本节用，岁谨盖藏，粮储所需，莫不慎重，而惟轸念民瘼有加无已，凡遇赈恤之事，恩施稠叠，即漕运之重，亦不惜截留散施，动以亿计。间遇京师粮价昂贵，辄发内仓米石，广设平糶。即如乾隆十八年至二十七年，此十年中统计截留漕米五百四十余万石，平糶米四十六万余石。十八年以前所截者不在此数，其他煮赈之米亦不在此数。臣伏念京通仓贮国计所关，今截留之数既多，则储积之数岂勉稍减，是不可不详加筹画者也。然臣窃思，欲弥补以前过截之米，则数多费繁，事属难行；欲永停向后之截留，而圣性爱民不容自己，偶遇有应行拨济之时，非臣下所得阻止计，惟有立定章程，使嗣后遇有截留，即续为弥补，但使漕运之年额无亏，则京仓自日益充裕。臣再四筹酌，查捐纳旧例，惟贡监一项可收本色，盖缘贡监每名粮数无多，力田之家耕获有余，即可投纳，实属便民。湖广、江西、江南、浙江均为产米之区，岁常丰稔，米谷有余。臣愚以为，莫若即将此项事例开于该省，令其收捐本色，或以三年五年为度，捐有成数，另行收贮。如遇有截漕之年，即于次年照所截之数补运京仓，或分为二年补运亦可。如无截留之年，即无庸补运，仍行贮备。如此，则京仓所入有缺必补，既免积久日亏之虞，而又隐为皇上预储一施恩黎庶之备，似两得其裨。至于长途挽运，不无需费。臣查有漕之七省，额设漕船六千六百六十余只，内湖广、江西、江南、浙江四省额船共有五千六百五十余只，为数最多，而每船额载漕粮不过六七百石，是以漕船遇有损伤，向有通帮洒带之例，盖其船只宽广，量加五七十石至百石，尽可装运。合计四省漕船，令其洒带三五十万石，搭运赴京，至为便易，无须另议雇运之烦。惟旗丁运粮，每石有给与赠米及截漕等银，但洒运无多，本与正额有别，又非常有之事，无庸照额给与，只须量加贴助，于收捐仓费内动用给发。如有不敷，再由收捐之省分另行筹定办理。若似此筹办，则补运之法亦似事便而费省。等因。乾隆二十八年六月初十日奉朱批：九卿议奏。钦此。钦遵。于本月十六日抄出到部。

臣等伏查，外省仓粮之积贮，本为民食所兼资，而京通天庾之正供尤属度支所由给，向来岁运漕粮除供在京官兵俸饷外，例无别项动拨，我皇上民依念切，渥泽逾涯，偶遇偏隅歉收青黄不接，辄荷恩膏特沛，至再至三。自发帑动谷而外，截留漕粮不惜数逾万亿，比因近京窪地秋霖未涸，特

旨拨给存仓米石，于五城设厂平糶。臣等核计加恩截漕数目，自乾隆十八年以来，至今已数至五百五十九万余石，而平糶之米又不下四十余万石，在我皇上惠爱元元有加无已，官储所费岂靳破格殊施。惟是漕运岁有常经，格外所截既多，则额中所登自减，自宜详加筹备，以裕仓储。今据侍郎英廉以捐纳旧例惟贡监一项可收本色，湖广、江西、江南、浙江均为产米之区，岁常丰稔，米谷有余，奏请即将此项事例开于该省，令其收捐本色，或以三年五年为度，捐有成数另行收贮。如遇有截漕之年照数补运京仓。等语。臣等伏思，各省每年运京漕米四百二十七万六千余石，而每年支放俸甲等米不下三百余万石，间遇地方水旱不时，上勤宵旰，截留平糶数复不资，太仓储蓄攸关，理应从长调剂。该侍郎所奏嗣后遇有截漕，即续为弥补，请令湖广等省开捐贡监，俱收本色，此在间有截漕之年，既可照数筹补，即并无截留之年，各地方得此捐谷，仓贮充裕，于国计民生洵为两有裨益。应如所奏办理。惟查各省常平贡监捐例，旧日所定谷数多寡不齐，湖广省每名自一百八十石起至二百八十石不等，而江西、江南、浙江三省则自一百三十六石以至二百七十石不等。在定例之初，谷价每石不过三四钱，上下报捐，自为便易。迨岁久生齿益繁，需用益广，谷价每石有在五六钱以上者。若令报捐仍照原定谷数投纳，诚恐生俊观望不前，难收实效。其如何酌中定议俾踊跃急公仓储充羨之处，应令各该督抚按照各地方现在时价情形折中详定，并酌议一应年限事宜，具题到日再议。其搭运赴京通帮洒带所需运费，自可于酌议仓费内支給应用。至所有一切筹办规条，应令各该督抚会同漕运总督一并详悉定议，到日再议。

再，查陕甘二省常平捐监谷数较之他省稍减，向例无论各省生俊俱准一体报捐，以故多赴陕甘投纳，而本省转属寥寥。今查甘省常平捐谷将及足数，惟陕省缺额尚多，其有邻近省分愿赴捐者仍听其自便外，至湖广等四省距陕甘既远，且本省已开捐本色，投纳甚为近便。应请嗣后湖广、江西、江南、浙江等省生俊停其远赴陕甘二省投捐，俟各该省捐有成数之后，再行酌量办理。至现在章程一定，约计行之数年，谷数自必日就充裕，将来本地偶遇需用，即可藉以拨济。并由地方一水毗连者，亦可就近挹注转输，并无庸截留正供，更须洒帮补运之处，均令各该督抚临时议奏办理可也。等因。乾隆二十八年七月十四日奏，本日奉旨：依议。钦此。为此，合咨前去，钦遵查照施行。等因。咨院行司。奉此。该布政使富明安查看得，漕粮乃天庾正供，国计所关，例不蠲缓。惟因我皇上民依念切，凡遇外省偶被灾歉及京师粮价昂贵，无不截漕赈恤，发仓平糶，隆恩稠叠，动以亿计。在圣主爱民保赤有加无已，而截留之数既多，则储备之数自减。天庾为国家本计，自应从长筹画，随时弥补，方足以充积贮而备供支。兹特俯允臣工所请，议定湖广、江西、江南、浙江四省均为产米之区，岁常丰稔，米谷有余，令将贡监开于本省收捐本色，或以三年五年为度，捐有成数，如遇截漕之年，即于次年照所截之数补运京仓。如无截漕之年，即行备贮。数年充裕之后，本地邻近偶遇需用，即可藉以拨济。诚与国计民生两有裨益。且因收捐旧例所定谷数较多，近年谷价昂贵，若照旧例收捐，恐生俊不能踊跃，难收实效，行令按照现在时值情形酌中详定，尤见因时制宜充羨仓储之至计。今逐一详查，通盘筹酌，捐监定例纳谷之外，每名原定收公费银三两，每石收耗谷三升，嗣又陆续加增，每石收仓费银四分，每名收户部换照银三钱，国子监换照银二钱，此外尚有运谷上仓一切盘脚等费。每名除输谷之外，各项需银不下二十金，若不将此等费用一并核计，止据现在时值酌中定数，本色既浮于折色，而输谷又有搬运上仓之繁，将来必致投捐无人，贻误补漕，所关匪细。除搭运赴京一切规条，现在会同粮道逐一确议，另详呈请会题外，所有捐纳贡监事宜逐一条议。

一、江西省乾隆四年题定捐监事例，每谷一石价银四钱，嗣于乾隆七年经陈前院奏准，加增银一钱，共银五钱。维时谷数虽已稍减，然俊秀捐监一名尚需谷二百一十六石，加之公费、仓费、耗谷、换照等项，较之以银投捐者为数尚多，是以开捐以来，输纳寥寥。且经今二十余年，谷价较前

加昂，若不通盘筹酌，折中定价，恐报捐不能踊跃，以致贻误补漕。查江西省各属谷价大概相仿，是以原议通省一例收捐。今酌议得，每谷一石作银八钱，每俊秀一名捐谷一百三十五石，加之公费银三两，仓费银五两四钱，户部换照银三钱，国子监换照银二钱，耗谷四石五升，以及运谷、上仓等费，共约需银不下二十两，名为每谷一石作银八钱，实止六钱有奇。如此酌中定价，似可期投捐踊跃，以收实效。至于附、增等生按数核计，附生应捐谷一百一十二石五斗，增生捐谷一百石，廪生捐谷七十五石，武生捐谷一百二十五石，青衣生捐谷一百八十七石五斗，仍照旧通省一例完纳。

一、江西省乾隆四年奉部议准收捐本色，止系捐纳监生，今奉廷议贡监并捐，所有各生捐贡一项，请照河工事例数目计算，由附生、监生捐谷一百八十石，增生捐谷一百五十石，廪生捐谷一百三十五石，俱准作贡生。

一、江西省乾隆四年奉文议准收捐监谷，原为补足常平定额，是以通省除府仓不收外，其余各厅州县俱按额收捐。今次捐纳贡监，为截漕备补之需，必须水陆可通，始能拨运。查南昌等十三府水陆俱属可通，各府均有附府首邑收捐。其府仓仍照旧例毋庸收捐。又查万载、乐安、泸溪、兴安、崇义、定南、长宁等七县，或在万山之中，或离水次路远，且该七县常平额谷已经捐输足数，均无庸再捐外，其余南昌等七十二厅州县应请一体收捐。

一、江西省乾隆四年奉文议准开捐，各生俊定以本邑报捐，毋许越赴邻邑交纳。嗣于乾隆六年奉前署两江杨督院具奏，无论本籍外省，俱令办纳本色，准其就便报捐。奉部议复，一省之内各就士民之便，听其随地报捐，事属可行，应如所奏办理在案。今次开捐，应请仍照部议，本省之人各就士民之便，听其随地报捐。

一、江西省乾隆四年收捐监谷，原定每谷一石外收耗谷三升。今次收捐仍请每石收耗谷三升。

一、江西省从前收捐，监生每名收捐解部换照饭银三钱，又公费银三两，内以一两五钱留为本省各衙门造册、纸笔、饭食等项之用，其余一两五钱同换照饭银三钱解司汇解户部交收。又，每名收国子监换照饭银二钱，汇解国子监交收。又，每石收仓费银四分，以为建仓之费。今收捐贡监，应请仍照旧例办理。

一、江西省乾隆四年奉文议准收捐谷石，由该州县出具仓收。一给本生，一报藩司。刊刻正副实收，编列号数，钤用印信，将副实收截发该州县，给与本生收执，掣回原发仓收。其正实收随同季册，按季详请咨部换填执照，发江转给本生收执，掣回副实收，岁底汇详送部。今收捐贡监，应请仍照旧例办理。

一、此次收捐贡监，原为补运截漕之用，充裕之后并可拨济本省邻省，自应广为收捐，以裕储备。应请以五年为度，通省不拘定额，尽数报捐，届期积算，即以此谷为备补截漕之用。倘奉洒带拨补以及奉拨协济邻省或本省，动用事竣均照数收捐补仓，以省采买之烦。

一、捐纳谷石既议粮船洒带，则各州县收有成数奉文起交之时，即应遵照碾米，听候拨帮洒带量收。但江西省粮船向因各州县多属山溪滩坝，不能赴兑，是以粮船回次除鄱阳、乐平、浮梁、德兴、万年、都昌、丰城等七县粮艘可到，系赴各该县水次受兑外，其余船只俱停泊省城。其各州县征收漕粮，各用小船运赴省仓交兑，所需运脚随漕征收支用。今各属收捐贡监谷石，并无此项运费。应请俟拨运之日，于司库正项内动用报销，并请照江西拨运米石脚费章程，内河船小水窄，凡米一石下水，每百里给水脚银一分，上水加二给水脚银一分二厘。遇有剥浅之处，凡剥米一石，每百里亦照本船之例给银一分。如小河险滩之处，原不通舟楫遇有急需用竹簰装运者，照铅山县例，下水每石每里给银三毫，上水三毫六丝；如原系通舟偶遇水涸舟不能行用竹簰装运者，照余干县例，下水每石每里给银二毫，上水二毫四丝。又，各属从仓口挑米下船及穿船上进仓，凡米一石，每里给银二厘，所有碾费照例于糠粃内抵给。

以上各款理合详请会题。等情到臣。据此，该臣看得，案准部咨，议令捐纳贡监开于本省，俱收本色，遇有截漕之年照数补运京仓，其捐纳谷价如何酌定，令臣等按照地方现在时值情形折衷详定，并酌议一应年限事宜，具题到日再议。等因。随经檄行布政司确查妥议详报去后。今据布政使富明安将捐纳一切事宜逐一参酌列款详议前来。臣复核无异。

谨会江南江西总督臣尹继善合词具题，伏祈皇上睿鉴敕部议复施行。为此，具本谨题请旨。

（批红）：江浙等四省贡监收捐本色之例并著停止。已有旨了。该部知道。

贵州学政陈筌为通飭各属捐纳贡监造册备案遵例举报优劣事奏折

乾隆三十一年四月二十二日

贵州学政·翰林院侍讲臣陈筌谨奏，为仰祈睿鉴事。

窃臣一介庸愚，毫无知识，荷蒙皇上天恩，简畀贵州学政，高厚鸿慈，捐糜难报。臣于上年十二月二十日抵任，一切学政事宜留心体访，凡属有关士习，务期实力整饬，不敢稍涉因循，上负圣明委任。臣查黔省地属苗疆，跋涉皆山，诸生见闻固陋，其立志向上者固不乏人，而幸博一衿恃符滋事者亦所在多有。即如本年正月间，遵义府贡生曾翊圣，因上年赴省乡试，寓居龙神庙中，遂与假冒女尼之匪僧严清熟识。文生李相廷常至翊圣寓中，亦与交结。缘严清欲赴遵义觅庙住持，时该府教授罗正先因公在省，曾翊圣引与相见，认为义女，并馈送鸡、茶等物。罗正先致书嘱托武生刘从龙代为照应，以致严清出入人户奸骗妇女，种种不法，深可痛恶。经该府县拿获详报。臣即分别咨参斥革，应听抚臣严审从重治罪。似此官方士习荡废已极，若不严加查察，有犯必惩，何以肃官箴而清学校。臣现面谕各府，于所属教职及文武各生实力稽查，毋得徇隐。臣仍于考试时亲加密访，如有荡闲逾检劣迹昭著者，立行参处究治，以示惩儆。

再，捐纳贡监黔省虽属无多，然合通省计之，亦不下千有余人。定例责成州县管辖，凡丁忧起复、斥革事故详明学臣考核，并于岁考按临时举报优劣，会同督抚查办，以昭劝惩，各省俱遵照办理。臣到任后，检查旧案，并无贡监底册，一切事故州县从不申详，优劣亦不举行，每逢乡试录科，只凭地方官一纸申送，便准收考，真贋无从辨别。旧习相沿，已非一日。伏查《学政全书》，开载甚明。况此项贡监由生员捐纳者甚少，余皆买卖子弟顶带荣身，其中不无作奸犯科武断乡曲之人，听其漫无稽考，似非循名责实之道。臣不敢以遵行定例因仍外省积习置不复问，现移咨抚臣方世俊，通飭各属，将所捐贡监造册送臣衙门备案，俟各府详送全到之后，臣督率地方官实力约束，仍遵例举报优劣。庶几有所责成，且于各省体制亦昭画一矣。

理合缮折恭奏，伏祈皇上训示。谨奏。

（朱批）：知道了。

浙江学政李宗文为加捐贡监验照补考等管见三条事奏折

乾隆三十一年七月初四日

浙江学政臣李宗文跪奏，为敬抒管见，仰祈训示事。

窃臣一介庸愚，蒙我皇上逾格擢用，畀以学政重任，夙夜战兢，惟恐不足，仰副万一。今考试宁波、绍兴、杭州已毕，所有一切规条，悉遵《学政全书》，不敢稍参己见。第就现在办理情形，不揣固陋，臚列管见三条，恭呈圣览。

一、岁贡一途所以优宿学之士，以备司训之选也。《学政全书》开载，学臣每岁将应贡生员屡经科举者，以食饩先后为序，一正二陪，严加考试。如年衰文谬，不许滥充。其正贡不堪，令以衣顶告老，次取陪贡；倘一陪不堪，更及二陪。务于挨序之中仍寓遴才之意。等语。查府学廪生四十

名，一年一贡；州学廪生三十名，三年二贡；县学廪生二十名，二年一贡。酌中为准，亦须三十年始得序贡，其中岂少年力衰颓之人。乃向来以衣顶报部者甚少，盖缘该生以文优始得食饩，以食饩既深并无过犯始得序贡。乃以年迈之故终于一衿，在本生未免穷途之感，在学臣不无末路之怜，是以挨序递贡。此办理之实在情形也。臣伏见我皇上云汉为章，加意作人。本年会试，于直省举子年力衰迈者分别岁数，秩以京衔，恩深意厚，诚多士旷世之遭也。臣愚请推广皇仁，敕部定议，于岁贡一途令学臣详加验看，有年力不堪者咨部请给应选职衔饬令告老，降取一陪二陪。如此，则章服荣身，可以偿数十年寒窗之志，而将来司训者亦渐有强干可用之人材矣。

一、生员加捐贡监赴学政呈验执照以便开除，此定例也。前学臣钱维城以近来诸生多有不行呈验，致虽经加捐，而本身廪、增、附又以积欠三考斥革者，请以领到部照半年为限，即行呈验开除，逾限分别戒饬注销。随奉部复，生员捐纳贡监，户部例应知照地方官取结，以缓令地方官接到部文即报明学政开除，奏准通行在案。臣查生员加捐贡监，多因作幕就馆，致欠一考两考，甚有已届三考，惧干斥革始行加捐者。此等生员例应按所欠次数补考，然后开除。若据地方官申报，则欠考次数地方官无案可稽。且照既未验，人定未归，学臣亦无由饬学押令赴补。若听其不补便与开除，则凡游学之生竟可八九年不至学宫，于稽查防范势更难周。如现在上虞县学积欠三考之附生顾士淑，既捐监生，抗不赴补，经臣檄催在案。伏祈皇上敕部分析详议，嗣后生员加捐贡监，如并无欠考，学臣即据州县报文，行学开除。若系欠考之生，学臣查明次数，行提调官勒限三个月。按次赴补，然后开除。倘逾限不补，将欠一二考之生发学戒饬，仍令补考；欠三考者，咨部注销。庶体例悉协而学政益昭详慎。再有岁试已届，州县未及申报，该生恐干欠考持照自行赴学呈验。若必俟州县申到，反致守候稽时。臣请令学臣一面查明有无欠考，照例补考开除；一面行知该生本籍，免其申报，以省文移往来，似亦因时制宜之一端也。

一、生员身列黉宫，以读书为业，不欲役以他务，是以乾隆元年钦奉谕旨：各省有令生员充当总甲图差之类，殊非国家优恤士子之意，嗣后举贡生员概行免派杂差。钦此。所以培养士风，恩至渥也。查浙江一省，向有生监充当庄书圩长、埠头牙行各名色，经前学臣李因培奏准严禁在案。臣按试宁波，生监中有以求免庄首乡长呈请者，再三访问，乃知宁波乡例，约以田三千亩为大庄，就大庄中分十小庄，每小庄三百亩为率。就中推一田亩最多之户立为庄首，一年一庄，轮值十年，则周而复始。庄首所掌催纳该年钱粮及修浚田间沟渠鸠工之事。庄首之下，设有保长，保长所掌拘解罪人及承应有司传唤之事，承当保长之人由庄首就本庄中推派愿当者当，不愿当者按亩出资雇替。在鄞县谓之庄首，在镇海谓之乡长，其名虽别，所掌略同。不论文武生监，惟以田亩多寡为差，多者则当庄首，少者亦应保长之役。夫国家正供，里下自相催办，可免吏胥之手。沟渠乃农田利赖，及集人听差，均政体所不可少之事，但充以生监，既无以示优恤，且设有一二抗不承充，欲详请斥革，则所违者非有明条；欲相视姑容，则效尤者转妨公事。窃思生监田多之家，仆从田丁必不乏人，即田少之生监，岂无以次成丁，何必正身承充。臣请皇上敕部行令抚臣，将宁波生监充当庄首乡长及派当保长，与庄书、牙行等一例禁止。如地方官奉行不力复有派充者，经臣察出，移咨抚臣指参。如此，则士子专心本业而差徭亦便于集事矣。

以上三条，臣愚昧之见，未稔有当，伏乞皇上训示。谨奏。

乾隆三十一年七月二十六日奉朱批：该部议奏。钦此。

著陕甘现行捐监之例停止及贡监仍准报捐事上谕

乾隆三十一年七月初四日

乾隆三十一年七月初四日内阁奉上谕：陕甘捐监事例，原因筹补仓储，以备缓急赈恤之需，行

之有年，仓谷尚未能充裕。闻近日渐至捐本色者少而折色者多，遇有需用谷石之处仍不敷支給。且以本地折色即向民间采买，恐不免勒派滋累，而承办官吏那移侵蚀之弊亦难保其必无，于积贮实政、闾阎生计均无裨益。现经降旨发库帑三百万两存留甘省备用，如遇年谷顺成米值平减之时，著即于此项银两内酌拨采买，陆续购补足，则当岁收丰稔既无虑贱伤农，即或偶有歉收，亦复足资赈粜。如库项买谷间有不足之处，并著该督随时奏闻，再行拨给。该督等其实心经理属妥办，务使积贮裕如，帑归实用。所有陕甘两省现行捐监之例，均著停止。如该省有愿捐贡监者，仍准其赴部报捐。该部知道。钦此。

著直隶等省停止捐监及贡监仍准报捐等事上谕

乾隆三十一年十月初十日

乾隆三十一年十月初十日内阁奉上谕：向来外省捐监事例，令其捐输本色，以补仓储。乃行之有年，渐至多捐折色，遇有需用之时仍属不敷支給。且州县官承办此事收捐时，难保其不多收勒索，或从中侵蚀那移，种种弊端皆所不免。自不若在部援纳，额数既有成规，不致浮收滋弊。况各省所捐折色仍须采买还仓，则拨用部帑较之动用州县存贮之项尤为妥协。是以前经降旨，将陕甘捐例停止，仍令愿捐贡监者赴部报捐，以归画一。现在除福建、广东、湖南、湖北、云南等五省，或在边远，或为出米之乡，著各该督抚查明实在情形，应行应止详悉具奏，再降谕旨外。所有直隶、安徽、山西、河南等省事同甘肃，即著一体停止，均令赴部投捐。至各该省仓谷积贮务须筹备充裕，倘有缺额谷石，俱即动项如数买补。俟后如有本省库项不敷应行请拨之处，该督抚等确核情形，随即据实奏闻，听候酌量拨给。该部知道。钦此。

安徽布政使富尼汉为贡监出继归宗应确查更补执照以广孝治事奏折

乾隆三十二年正月二十七日

安徽布政使奴才富尼汉跪奏，为贡监出继归宗，应请严查确实，更补执照，以广孝治事。

窃照乾隆二十八年户部奏准，嗣后各官生贡监执照所开履历、籍贯，核明确属错讹无关弊窦以及水火盗贼遗失报明有案者，准其更补外，其余更正姓名、年貌、改填三代籍贯及指称过继归宗等情事，无确据均不准更补。等因通行在案。所以杜冒滥而重名器，法至慎也。奴才于乾隆三十一年四月间据滁州全椒县详，监生吴林蕙于乾隆二十八年入陕捐监，给有实收，尚未换照。实收内开，父名吴霜青，今因胞伯吴电紫身故无子，以该生承继为嗣，呈报丁忧，请将实收内父名更正，咨部换照。等情。当查与例不符，节经批飭确讯详报。旋据该县讯明，该生实属应继，并无假捏，并为后父母所钟爱，既不能更换执照，情愿将实收申送缴销，以全继嗣。等情详复前来。业经据情详咨在案。奴才查士子读书穷理，首以敦伦为重，倘遇本身父母及伯叔身故无嗣，既不便以身列成，均置所生于不顾，而又不能以归宗、出继呈请更补执照，则欲尽孝，思势难顾惜微名，惟有遵例缴照开除名册。伏思士子如果滋事不法，即咨革治罪，分所应得。今以尽伦之故褫其名器，似与圣明教孝之意稍有未符。查定例，官员出仕之后始行出继归宗者，即着该官员取本旗籍印结详报咨部，改正三代。等因。贡监事同一例，奴才愚见，仰请皇上敕下部臣，通行直省，嗣后贡监各生报捐之后，除更改名姓、年貌、三代、籍贯概不准更补外，其有本身父母及伯叔身故无嗣，例应该生归宗出继者，令地方官传集本生及族邻人等讯明，如果属实，委无捏饰顶冒情弊，取具各结，将原捐执照详请咨换，准其归宗出继。倘有假冒弊混，除将本生斥革外，仍照违制律治罪；扶同出结之族邻人等，照不应重律杖八十；地方官照例议处。如有贿嘱察出，计赃按律定拟。如此，则冒滥之禁仍严而教孝之道益广矣。

奴才愚昧之见，是否有当，伏乞皇上睿鉴训示施行。谨奏。

（朱批）：该部议奏。

江苏学政曹秀先为考录江宁贡监生童遗才事奏折

乾隆三十三年八月二十二日

提督江苏学政·工部右侍郎臣曹秀先谨奏，为奏闻事。

窃臣于六月初旬自江阴学署起程，前赴江宁举行科试，以次录遗，曾经具折奏明在案。所有江宁府属贡监生童已于六月杪照例考试完竣，随于七月中旬陆续分场考录江苏全属贡监生员遗才，将录取遗才诸生文卷发交提调官拆号造册，并送入闱乡试。伏念臣才识庸愚，学殖浅陋，荷蒙圣主洪恩，畀以衡文重任，三载以来，夙夜兢凜，固不敢戈誉干名稍涉宽纵，亦不敢乖张自用弗守章程，自在圣明洞鉴之中。惟督课士子，讲明文体，敦崇经学，总以安分为急务，此臣所谆谆致意者。兹幸岁、科两试，如期考毕，爰以八月初十日起程回臣江阴驻扎衙门。定以九月中旬举行武科录遗，因人数无多，查向例内场外场只须三四日即可完竣。臣仍当小心公慎妥办。

臣合将办理情节缮折奏闻，伏祈皇上睿鉴。臣谨奏。

（朱批）：知道了。

著任满学政举荐生员汇试贡监会同督抚一体考核事上谕

乾隆三十四年六月初六日

乾隆三十四年六月初六日内阁奉【上谕】：向来各省学政三年任满，例应举荐生员优劣。其优生之保题到部者，经礼部汇试，分别廪、增、附生，作为贡监送入，成均肄业。且有按省分大小，定额不得过几名之令。而日久相沿，奉行殊难，责实在学政之拘谨，畏事者多以无可报举报为辞，人才既不无屈抑。其他好名市惠之人，虽所举不敢逾额，必至尽数充选，自博宽厚之誉。况学政与生员分属师生，随时得以相见，其中保无纳贽夤缘情弊，于造士抡才甚有关系。但三年举行一次，为奖励士子之一端，若竟辍而不行，未免因噎废食。嗣后学政举荐优生，著照选拔贡生之例，会同该督抚一体考核，果属文行兼优者准其会衔保题。庶诸生不致滥遗，而甄拔亦昭公当。其报劣之例，仍照旧加意核实办理。钦此。

著军机大臣等议复贡监报捐酌量职衔等事上谕

乾隆三十五年十月十一日

乾隆三十五年十月十一日内阁奉上谕：从前暂开捐例，原属一时权宜，以遂海内士民急公上进之愿，究于事体非宜。停捐以后，曾有奏请再行开例者，朕皆斥而不允。今国家帑藏充盈，储积广有，朕方屡次加恩普蠲粮赋，惟期藏富闾阎，国用更无处不足，开捐一事竟当永远停止。至于现行事例，如报捐贡监并微末职衔及加级封典等项，皆与名器无妨，原可仍听照旧捐纳，因思未登仕籍之人只冀邀冠服章身，并有加捐实级请封藉以显扬者，自属人情之常。且所捐只系虚衔，既无碍正途铨选，亦不致滥窃误公，若仅以末秩卑阶为限，未免阻人幸荣之志。或有推广其例，量以何衔为止，俾伊等各随所愿量力自为报捐。至降革留任人员，原属因公处分，且其人尚不至于摈弃，是以量予加恩，俾得在任自效。但一经议处，即停其升转，直待数年无过，方准开复。从前曾有捐复之例，后经部议删除。第念此等人员内未常无可及锋而用之人，若以微眚随带多年，亦觉可惜，自当仍准援例捐复，俾得罪勉自新。以上各条应如何定例之处，著军机大臣会同各该部详悉妥议具奏。钦此。

湖北布政使富尼汉为请定贡监录科由府考送之例以杜取巧规避事奏折

乾隆三十六年九月二十五日

湖北布政使奴才富尼汉跪奏，为请定贡监录科由府考送之例，以杜取巧规避事。

窃查捐纳贡监生，每逢乡试之年，有志观光者向由该州县验照给文，径送学臣收考，并报藩司查核。奴才于上年履任，正值恩科乡试之时，见各属贡监生投文报考，实繁有徒。迨至学臣开考之日，所到者寥寥无几。本年乡场亦复如是。察其所以然之故，盖缘乾隆三十年五月内前任安徽布政使程焘奏准定例内开，直省社长在于不应考试之贡监生内选充。等因。细绎例意，原欲令殷实之户经理社仓，以昭慎重。而该贡监等本非心所乐从，藉有应试免充之例，不论现在是否读书肄业，概称应考起文，其实未尝赴试，学臣曾否收考，州县无从而知，致令坐博能文之名，兼获免差之利。伏思圣明在上，纲纪肃清，岂容若辈取巧避差。应请嗣后捐纳贡监生愿应试者，仍由各州县起文申送，该管知府汇总考试。如果文理可观，并无雇倩情事，方准加结转送学臣收考，仍报明藩司并行地方官知照。庶鱼目混珠之弊得除，而选充社长亦不致巧取规避矣。

是否可行，伏乞皇上睿鉴。谨奏。

（朱批）：该部议奏。

著将巡幸天津照例考试位列二等之贡监生赏赐缎匹等事上谕

乾隆三十八年三月二十日

同日内阁奉谕：朕因永定、北运两河工程告竣，莅省成事，临幸天津。直省士子夹道欢迎，输忱蹈咏，进献诗册者甚多。因照从前巡幸江泽山东之例，命题考试，就其文义高下，量加录取。所有列在一等之生员顾堃、李廷敬，贡生闵思义、陆伯焜，俱著赏给举人。其举人杜兆基，著以内阁中书补用。其列在二等之进士张虎拜，举人张方理、秦櫛、邱桂芬、谢肇洞、吴裕德、祝堃，生员陆蓉、邱桂山、刘祖志，贡监生邱人龙、杨照、李宪乔、赵珍，俱著赏给四品，以示省方观风、惠加誉髦之至意。钦此。

著闽浙总督钟音等回奏闽省贡监换照迟误事上谕

乾隆三十八年四月初七日

大学士刘字寄闽浙总督钟、福建巡抚余，乾隆三十八年四月初七日奉上谕：本日户部议奏闽省缴照迟误一折，所驳甚是，已依议行矣。贡监换照立限二年，为期本属甚宽。现在各省俱经陆续咨部换给，何以闽省独逾限一载有余方行呈缴，并声明尚有未查各县现在飭催。是闽省初奉部文时竟全未办及，直待满限逾年始为汇咨。即或该贡监等观望不前，亦何不及早飭催，听其迟误若此？钟音、余文仪前后两任，所办何事？著传谕钟音、余文仪，令其即行明白回奏。钦此。遵旨寄信前来。

闽浙总督钟音为遵旨复奏闽省贡监换照延迟事奏折

乾隆三十八年四月二十八日

奴才钟音谨奏，为遵旨复奏事。

乾隆三十八年四月二十五日承准大学士刘统勋字寄内开，乾隆三十八年四月初七日奉上谕：本日户部议奏闽省缴照迟误一折，所驳甚是，已依议行矣。贡监换照立限二年，为期本属甚宽。现在各省俱经陆续咨部换给，何以闽省独逾限一载有余，并声明尚有未查各县现已飭催。是闽省初奉部

文时竟全未办及，直待满限逾年始为汇咨。即或该贡监等观望不前，亦何不及早飭催，听其迟误若此？钟音、余文仪前后两任，所办何事？著传谕钟音、余文仪，令其即行明白回奏。钦此。遵旨寄信前来。

奴才跪读之下，不胜慌悚。伏查此案远年贡监执照未填年貌、三代，于三十四年十二月内经前抚臣造册咨部，换给八百九十余名，其再宽限二年谕旨系三十五年正月二十五日前抚臣温福任内准到部咨，连闰扣至三十六年十二月二十五日。二年之限届满，当经温福行司，飭令地方官，各就该管境内遍行出示，明白晓谕，按限呈缴请换。倘或再逾限期，即将原照查销，革去贡监。等因。遵行在案。奴才于是年七月到福建巡抚任，旋于三十六年七月卸巡抚事，尚未届限，随移文抚臣余文仪接办。兹奉谕旨飭询，始知逾限年余汇册咨部。现今抚臣余文仪巡视下南漳泉，回省尚需时日。奴才随札藩司送卷检阅。查该贡监既复逾限不缴，则是伊等抗违自误，应即遵照原行查销，未便再任饰延。乃更声称，尚有未查各县，现已飭催。而逾限载余之处，又不查明指参，办理实属舛错，现在督藩司并知照抚臣另行查办外。惟是此案虽系抚臣衙门专政，而奴才近在同城，不能留心督催，以致上烦宸衷，抚躬滋疚，咎实难辞，仰恳圣慈，将奴才交部议处，以为疏忽者戒。

合先遵旨恭折回奏，伏乞皇上睿鉴训示。谨奏。

（朱批）：但上紧督办，此次姑免。

福建巡抚余文仪为遵旨复奏闽省贡监换照延迟事奏折

乾隆三十八年五月十三日

福建巡抚臣余文仪谨奏，为遵旨回奏事。

乾隆三十八年四月初七日奉上谕：本日户部议奏闽省缴照延迟一折，所驳甚是，已依议行矣。贡监换照立限二年，为期本属甚宽。现在各省俱经陆续咨部换给，何以闽省独逾限一载有余，并声明尚有未查各县现已飭催。是闽省初奉部文时竟全未办及，直待满限逾年始为汇咨。即或该贡监等观望不前，亦何不及早飭催，听其迟误若此？钟音、余文仪前后两任，所办何事？著传谕钟音、余文仪，令其即行明白回奏。钦此。

臣查远年贡监执照，先于乾隆三十四年十二月经前抚臣咨部换给八百九十余名。续于三十五年正月二十五日准到部咨，再宽二年请换。倘或再逾限期，即将原照查销，革去贡监。等因。当经前抚臣温福行司转飭办理，并经接任抚臣钟音飭催在案。自续准部咨之日起，连闰扣至三十六年十二月二十五日，二年限满。臣于三十六年七月二十二日到任，当查此案例限将届，随即檄司实力清查缴换，倘有迟逾即照原行查销。复叠次札檄勒催去后。据藩司钱琦复称，各属县总以各生远出游学贸易未回无凭催缴为词，旋于三十八年二月内始据将已缴各照造册请咨。是此案逾限年余，既未查明指参。而该贡监始终抗违，应即查销。乃更声称，尚有未缴各县，现已飭催办理，实属舛错。兹奉谕旨飭询，惶悚无地。除本案飭司另办并取承查及督催不力各职名参奏外，臣于此案不能上紧督催，又复据详率咨，咎实难辞，仰恳圣慈，将臣交部议处，以为疏忽者戒。

合先遵旨回奏，伏乞皇上睿鉴训示。

再，臣因巡查漳泉海口一带，以致复奏稍稽。合并陈明。谨奏。

乾隆三十八年六月十四日奉朱批：该部察议具奏。钦此。

礼部尚书刘统勋等为议复闽省贡监换照延迟销去巡抚余文仪纪录二次事题本

乾隆三十八年七月初二日

经筵日讲·起居注官·太子太保·东阁大学士·礼部尚书兼管刑部·掌翰林院事·管理吏部事

务革职留任臣刘统勋等谨题，为遵旨回奏事。

该臣等议得，内阁抄出福建巡抚余文仪奏称，乾隆三十八年四月初七日奉上谕：本日户部议奏闽省缴照迟延一折，所驳甚是，已依议行矣。贡监换照立限二年，为期本属甚宽。现在各省俱经陆续咨部换给，何以闽省独逾限一载有余，并声明尚有未查各县现已飭催。是闽省初奉部文时竟全未办及，直待满限逾年始为汇咨。即或该贡监等观望不前，亦何不及早飭催，听其迟误若此？钟音、余文仪前后两任，所办何事？著传谕钟音、余文仪，令其即行明白回奏。钦此。臣伏查远年贡监执照，先于乾隆三十四年十二月经前抚臣咨部换给八百九十余名。续于三十五年正月二十五日准到部咨，再宽二年请换。倘再逾限，即将原照查销，革去贡监。等因。当经前抚臣温福行司转飭办理，并接任抚臣钟音飭催在案。自续准部咨之日起，连闰扣至三十六年十二月二十五日二年限满。臣于三十六年七月二十二日到任，当查此案例限将届，随即檄司实力清查缴换，倘有迟逾照原行查销。复叠次札檄勒催去后。据藩司钱琦复称，各属县总以各生远出游学贸易未回无凭催缴为词，旋于三十八年二月内始据将已缴各照造册请咨。是此案逾限年余，既未查明指参。而该贡监始终抗违，应即查销。乃更声称，尚有未缴各县，现已飭催办理，实属舛错。兹奉谕旨飭询，惶悚无地。除本案飭司另办并取承查及督催不力各职名参奏外，臣于此案不能上紧督催，又复据详率咨，咎实难辞，仰恳圣慈，将臣交部议处，以为疏忽者戒。合先遵旨回奏，伏乞皇上睿鉴训示。再，臣因巡查漳泉海口一带，以致复奏稍稽。合并陈明。谨奏。乾隆三十八年六月十四日奉朱批：该部察议具奏。钦此。钦遵。于六月十七日抄出到部。

查福建巡抚余文仪于远年贡监执照并不遵依部限飭催缴换，听其迟误，实属不合，应将福建巡抚余文仪照不力行督催罚俸一年例，罚俸一年；有记录三十二次，应销去纪录二次抵罚俸一年，免其罚俸。恭候命下，臣部遵奉施行。

臣等未敢擅便，谨题请旨。

（批红）：余文仪著销去纪录二次，免其罚俸。

山西学政曹锡宝为贡监录科卷面宜取消注明恩拔等字样事奏折

乾隆三十八年七月十八日

山西学政臣曹锡宝跪奏，为请旨事。

窃查生员岁、科两试，卷面向俱注明廪、增、附、青等字样，前学臣邹树本以试卷之密封宜密，奏请禁止填写，经部议准通行在案。惟贡监录科尚沿旧例注明。臣查贡生有恩贡、拔贡、副榜、岁贡、捐贡之不同，监生有廪监、增监、附监及俊秀监之例，在学臣凭文去取，虽不敢故为迁就，而贡监等字样显著卷面，或恐稍存成见，即未能鉴空衡平，似宜亦照生员之例，卷面止写生字，其恩、拔、岁、副、监生等字样概行停止填注，庶考校益加严密而体例亦属相符。

臣愚昧之见，是否有当，伏乞皇上训示施行。谨奏。

（朱批）：该部议奏。

闽浙总督钟音等为遵旨查明闽省贡监换照延迟详列应参员名等事奏折

乾隆三十八年七月十九日

闽浙总督臣钟音、福建巡抚臣余文仪谨奏，为遵旨查明具奏事。

窃照闽省贡监换照迟逾定限一案，经户部查奏请旨飭交臣钟音，会同臣余文仪详晰确查，是否地方官奉文之初未经办及，致各生无由按限呈缴，抑系各该生观望不前自行贻误之处，分别查明据实具奏，到日再行核议。等因移咨到臣等。随行藩司，严查各属奉文之初是否及早晓谕及本生于何

日具呈地方官、于何日申详，据实分别办理去后。兹据福建布政使钱琦查明，各属奉文之初即经遍示晓谕，并无未周未办之处，是以各贡监中有遵限呈缴者，亦有因循迟至限外始缴者，并将具呈申详各日期分晰造册，开列应参职名，详送前来。臣等伏查，闽省自乾隆三十五年正月二十五日接准部文起，连闰扣至三十六年十二月二十五日，二年限满。臣余文仪原咨，贡监换照共二百一十四名，今详细确查，内止四十三名限外具呈，系本生观望不前自行贻误，应将执照照例查销；其余一百七十一名俱在限内具呈，实系地方官迟详所致，其咎不在本生，应予换照。所有承办迟延之闽县等一十七州县暨稽延通案原咨声明未到之长乐等六县及督催不力之九府州，理合开列员名清单，恭呈御览。至布政使钱琦，既不早为实力督催，及至届限又不分别查办，以致迟逾定限，咎实难辞，请旨一并交部议处。

除各册送部查核外，臣等谨合词具奏，伏乞皇上睿鉴敕部核议施行。

再，臣余文仪办理疏忽，先经奏请议处，业蒙圣恩交部在案。

又，今次须缴贡监执照三百六十张，查系久逾定限，均属本生自行贻误，一并列册送部，照例查销。合并陈明。谨奏。

（朱批）：该部议奏。

著于各省贡监生应试落榜者中选充书籍誊录事上谕

乾隆三十九年八月十九日

乾隆三十九年八月十九日内阁奉上谕：办理四库全书处并荟要二处所用誊录计六百余名，而行缮录之书籍甚多。誊录中颇有遵例报捐陆续开缺者，即须随时预补，不可不预为筹备。因思现在京闱乡试各省贡监生应试者千有余人，莫若发榜后落卷内择其字画匀净可供抄录者酌取备用，较为省便。著交曹秀先、高贵同派出之同考官窦光、吴玉纶、周于礼、赵佑、戈源、善聪留住贡院，将未经取中南北中皿弥封墨卷公同翻阅，挑取五六百卷，交与吏部，按照名次拆卷填注。此内如有本系誊录即行扣除，余俱出榜晓示，注册俟补。其有本生告假或不充愿充当者，亦听其便。钦【此】。

大学士于敏中等为预备考试各省进献诗册贡监生员等事奏折

乾隆四十一年四月十八日

臣于敏中等谨奏。

本日奉旨：此次直隶及各省进献诗册之进士举人、贡监生员等，著于二十日考试。钦此。所有士子试卷交学臣罗源汉备办，照例弥封。其考试公所桌凳、饭食、茶水等项，交督臣周元理预备。所有应请特派监试大臣四员、侍卫四员监视稽查，听御前大臣奏派。其应派之护军，交该管处酌量派往。至钦命诗赋论题三道，即于二十日清晨，由监试大臣祇领。

谨奏。

著将辟经天津照例考试位列二等之贡监生人等赏赐缎匹事上谕

乾隆四十一年四月二十一日

乾隆四十一年四月二十一日内阁奉上谕：朕因平定两金川告成，阙里回銮，举行郊劳盛典，辟途经过津门，直隶及各省士子祇迎道左，抃颂抒诚，进献诗赋者甚多，因照此次在东省召试之例，就其文义量加甄录。所有列在一等之进士、举人邱桂山、祝堃、洪榜、戴衢亨、关槐，俱著以内阁中书补用；万年、方起莘、张曾太，俱著赏给举人。其列在二等之举人、贡监生员周光裕、陆滋、李蔚观、王奉曾、郭纬銮、叶汝兰、薛蓉、张景运、王绩著、黄继光、周纘、钱敬熙、黄骅、吴蔚

光、蒋传馨、周嘉猷、王丕烈、黄景仁、邱桂芬，俱著赏缎二匹，以示庆惠士林之至意。钦此。

著考列二等之山东天津贡监生员可效力四库全书处誊录事上谕

乾隆四十一年五月二十六日

乾隆四十一年五月二十六日内阁奉上谕：此次巡幸山东、天津两处，召试所取二等之举人、贡监生员等。著照上届巡幸天津召试二等各生之例，有愿在四库全书处效力者，俱准其誊录上行走。钦此。

两江总督萨载等为江西贡监生员愿迎驾献诗事奏折

乾隆四十五年三月十七日

臣萨载、臣杨魁谨奏，为奏明请旨事。

窃臣等接准江西抚臣郝硕、学臣汪永锡咨开，钦惟乾隆四十五年恭逢圣驾南巡，江西贡监生员等素深爱戴之忱，共切就瞻之愿，内有干朝干等三十三名，情愿前赴江南恭迎銮辂，进献诗赋。伏查乾隆四十一年圣驾巡幸天津，恩许外籍诸生一体进献诗赋，今江西士子请随江左诸生拜舞迎銮，恭进南巡诗赋，并请附入钟山书院，恭候召试。等因移咨前来。臣等查历届圣驾南巡江西，士子未遂观光之愿，兹来南迎銮献赋，益征圣主寿考作人之雅化。

应否准其与江南士子一体考试之处，臣等未敢擅便，谨会同江苏学臣刘墉、安徽学臣戴第元恭折具奏，伏乞皇上训示遵行。谨奏。

（朱批）：知道了。

吏部尚书永贵等为议复贡监生沈玮等誊录《音韵述微》告竣照例议叙事题本

乾隆四十六年十月二十七日

经筵讲官·议政大臣·协办大学士·吏部尚书·镶蓝旗汉军都统·世袭三等轻车都尉革职留任臣永贵等谨题，为《音韵述微》编辑已竣等事。

该臣等议得，先经内阁抄出，户部尚书梁国治等奏称，窃查《音韵述微》一书先经原任大学士刘纶、尚书秦蕙田先后奉旨编辑，嗣命大学士于敏中接办。乾隆四十二年五月内又奉旨，派臣梁国治同金士松办理。四十四年十二月又奉旨派臣德保同办。臣等谨率同纂修官·中允曹仁虎，司业翁方纲，编修李尧栋、吴省兰，依次纂辑，按卯进呈。今入声韵之十七洽亦已纂辑完竣，恭呈御览。惟查刘纶、秦蕙田编辑之初，系照广韵体例，以一东二冬分部。嗣经于敏中请旨，遵照《钦定佩文诗韵》《钦定音韵阐微》二书之例，仍用一东二冬分部，所有前此刘纶等已进平声各卷，有与《诗韵阐微》未符者，应一律归并改正。现在臣等率同原纂修等官，将前书画一办理，以符体例，俟办竣后另缮全帙，恭表呈进，敬请御制序文，冠于卷首，一面交武英殿刊刻颁行，一面写入四库全书。除臣等及纂修不敢仰邀议叙外，所有誊录贡监生沈玮、谢顺、王若浚、许元仲及供事一名，均系自备资斧，效力有年，可否准其议叙，出自皇上天恩。如蒙恩准，所有应缮全帙正本及写入四库全书各分，应请交与四库馆，令原办之誊录等如式缮写完竣，仍照四库馆例核算，补满字数，再行咨部铨选。所有《音韵述微》编辑已竣缘由，理合恭折具奏，伏祈皇上训示。等因。奉旨：知道了。钦此。钦遵。抄出到部。臣部随移咨四库馆，将承办《音韵述微》之誊录、供事分别等第，造具年貌、三代、履历并到馆日期清册，送部办理去后。续准四库馆将誊录沈玮等分别等第，造具清册咨部。臣部查誊录内王若浚一员，册内注明四十一年在甘肃捐监，其余各员所捐职衔、监生，应照册开单移咨户部查明是否相符去后。今准户部复称，誊录捐职州同沈玮等核对原捐底册均属相

符，捐职县丞谢顺系乾隆四十一年十一月内在甘肃捐纳监生，捐职盐大使许元仲系在部捐纳监生。等因。于本年九月二十九日咨送到部。

查乾隆四十二年十二月内方略馆承办各种书籍告竣，在馆誊录送部议叙，经臣部议复，将列为一等之誊录，捐职州同、县丞等项，各准其以应得之缺归于双月升选二缺之后选用一人，二等者归于双月四选一升五缺之后选用一人；列为一等之未考职供事免其考职，准其以从九品未入流。二项掣定职衔，归于双月升选十缺之后选用。又，乾隆四十六年八月内方略馆承办《两金川方略》告竣从优议叙案内，列为一等之誊录、捐职盐大使准其以应得之缺，俟一应补一捐纳一举人轮用三班之后补用。等因各在案。今《音韵述微》告竣，在馆誊录、供事等，该馆既称均系自备资斧效力有年，奏请议叙。除总裁、纂修等官该馆奏明不敢仰邀议叙应毋庸议外，应将列为一等之誊录·捐职州同沈玮，捐职县丞谢顺等，请照方略馆议叙之例，各准其以应得之缺归于双月升选二缺之后选用一人，列为二等之誊录·捐职县丞王若浚照例准其以应得之缺归于双月四选一升五缺之后选用一人；列为一等之誊录·捐职盐大使许元仲照方略馆从优议叙之例量为酌减，准其以应得之缺俟一应补一捐纳一举人轮用四班之后补用；列为一等之未考职供事梁谦照例免其考职，准其以从九品未入流二项兼掣掣定职衔，归于双月升选十缺之后选用。均照例给与议叙执照，取具本馆咨文并同乡京官印结投部，准其铨选。先用一等，次用二等。如等第、班次相同者，按其期满捐职日期先后注册，统俟到馆之日起扣足五年，始准报部铨选。所有应缮全帙正本及写入四库全书各分，应交与四库馆，令原办之该誊录沈玮等如式缮写完竣，仍照四库馆例核算补满字数，再行咨部铨选。至誊录·捐职县丞谢顺、王若浚，均系乾隆四十一年在甘肃捐监，应俟五年期满后效力三年，始准咨部注册铨选。恭候命下，臣部遵奉施行。

臣等未敢擅便，谨题请旨。

（批红）：依议。

陕甘总督李侍尧为续查官员捏灾冒赈亲族捐纳贡监官职一体斥革事奏折

乾隆四十七年正月二十三日

三品顶带·管理陕甘总督臣李侍尧谨奏，为续行查出捏灾冒赈□官犯子侄弟兄捐纳贡监、官职，请旨斥革事。

窃臣前准部咨，令将□□□冒赈各员在任时为其子捐纳官职、监生者□□一体奏请斥革。等因。经臣将从前□□官犯查明，各犯子嗣在伊父任内捐纳官职、贡监生者共六十六名，分别具奏追照斥革在案。兹将陆续解到各官犯讯明，各该犯在任时，为其子侄弟兄捐纳贡监生三名。又，查出参革□□□知县顾汝衡第三子顾廷桂在伊父任内有监□□纳府经历职衔，应请一并斥革，以肃法纪。□□□在甘省者即行追照送部查销。其未经□□者，臣飞咨各原籍严查，分别咨奏追照斥革外。

所有续行查出各犯属捐纳职监缘由，谨缮名单恭呈御览，伏祈皇上睿鉴。谨奏。

乾隆四十七年二月奉朱批：该部知道。钦此。

著将妄议以粮准银捐纳贡监等事御史富森阿仍改用员外郎事上谕

乾隆五十年十二月初二日

乾隆五十年十二月初二日内阁奉上谕：御史富森阿条陈各款，其言似是而于事皆断不可行。如所称，民间征收地丁请兑收本色，以准钱粮，以代采买。等语。地丁钱粮款项纷繁，俱有定则，历久遵行。今欲以米易银，不特更张烦扰，且地有肥硇，米有贵贱，一乡一邑已各不齐，如按例定官

价，则民间应交银一两，即需交米一石，断非所乐从。而以时价折算，则市集交易贵贱随时，又将何所折中作为定准，转启官吏抑勒、侵渔诸弊。况各省地丁钱粮不下千余万两，若尽以易米，堆积既多，陈陈相因，必致红朽，此其事之断不可行者也。又所称，劝民捐输社谷，计其谷石所值，足敷捐纳贡监之数，即予以贡监，及报捐人员并恩准赎罪之人，但照监粮之例，以粮准银。等语。以粮准银，捐纳贡监最易滋弊。行之甘肃一省，而王亶望已构成大案。今该御史竟欲各省踵而行之，其流弊尚可问耶？至所称禁止烧酒造曲及不准栽种烟草二事，此二物固属无益，但烟草一项不特遍天下皆然，即外藩诸部亦无不相习成风。烧酒一项虽为糜费谷食，而已为闾阎食用所不可少。况所用多系高粱，亦非米谷。此二项民间藉以贸易图利者不可胜数，虽欲禁止而势所不能，徒滋胥役藉端需索诸弊，究于实政有何裨益？该御史职司言路，如果有关于国计民生之事，原应据实直陈，若似此摭拾浮词毛举细故，不过如明季科道藉建白为沽名，其言虽若娓娓可听，而于政事毫无所补，亦安用此条奏为耶？富森阿系旗人，乃沾染习气愈趋愈下更属不合，亦不值将伊治罪，但其识见如此迂谬，岂可复胜御史之任？富森阿本系员外郎改授御史，著仍以员外用。原折著掷还。钦此。

著嗣后巡幸各省由俊秀报捐贡监生等员毋庸参加召试事上谕

乾隆五十三年二月二十五日

乾隆五十三年二月二十五日内阁奉上谕：御史龚骞文奏此次天津恭献诗赋士子，有由三分四库书总校赏给举人者，又有两侍郎一巡抚两藩司亲子及京堂翰詹科道子弟遇乡试之年例入官卷者，应逐一查明严加防范，以杜替倩。等语。朕向来省方观民，清弊所临，士子迎銮献赋，举行召试，量才录取，分别赏给中书举人，原以振拔单寒为苦志力学者劝，若此等士子内其父兄已登仕籍，均得邀恩以官卷入场应试，则自有出身之途，又何必欲巡幸时进献诗赋冀图录取侵占寒畯之路。至由三分四库书总校议叙赏给举人者，伊等以讎校微劳得厕举科已为侥幸，若又应召试复思幸获，尤属不知止足，岂朕嘉惠寒素劝励绩学之意。所有此次进献诗赋士子，内而京堂，外而督抚藩臬，以及翰詹科道子弟并校书议叙赏给举人及由俊秀报捐贡监生者，竟著毋庸考试。嗣后巡幸各省设有召试之典，即以此为例。折并发。钦此。

直隶及各省举贡监生不准预试名单

乾隆五十三年二月二十七日

直隶省举人贡监生不准预试名单

李烜，左都御史李绶之孙；
戈澍，少卿戈源族弟；
戈廷桢，少卿戈源堂侄；
郑俨，藩司郑源琇之子；
杜朝阳，庶吉士杜南堂堂叔祖；
张煦，丁忧户部主事张灼堂弟；
张虎士，中书张虎拜堂弟；
李煌，原任道员纪叔曾之婿；
杨毓锦，中书杨毓之弟；
陈预，原任道员陈庭学之子；
刘瀛，丁忧道员刘锡嘏之子；
杨迦译，现任知县杨仪之子；

傅之，现任游击傅承明之子；
胡又兰，三分四库全书议叙恩赏举人。
各省举人贡监生不准预试名单
谢扬镇，吏部侍郎谢墉之子；
刘宝筏，仓场侍郎刘秉恬之子；
谭光祥，云南巡抚谭尚忠之子；
窦汝璜，宗人府府丞窦光鼐之子；
钱桂，编修钱枬之弟；
汪贤书，军机章京御史汪日章之子；
陈廷硕，藩司陈步瀛之子；
钱楷，礼部郎中程维岳之甥；
赵本治，刑部员外郎马永年之婿；
韩崧，刑部员外郎韩崧之弟；
钱福胙，户部主事钱豫章之弟；
王廉，保定府知府王汝璧之子；
吴鼎，保定府知府王汝璧之婿；
张彤，军机章京中书张师诚之兄；
童赓扬，三分四库全书议叙恩赏举人；
祝孝永，三分四库全书议叙恩赏举人；
马德，三分四库全书议叙恩赏举人；
徐准宜，捐监生；
鲍遵，捐监生；
叶以佑，捐监生；
朱孙垣，捐监生；
沈昌培，捐监生；
徐予嘉，捐监生；
周万青，捐监生；
黄锦辉，捐监生。

礼部尚书德保等为奉命考录考职贡监及四库馆议叙誊录人员并呈览试卷事奏折

乾隆五十三年六月初一日

臣德保、臣李绶、臣吉梦熊谨奏。

臣等于五月二十八日奉命阅看贡监考职试卷并附考四库馆议叙誊录人员，奉到钦命策题一道，遵即于二十九日在贡院内一体隔别考试。查上次贡监考职试卷四百七十六卷，共取六十八卷。此次收到试卷五百零八卷，臣等公同悉心校阅，于三十日会同监试御史臣傅英等严加复试，拟取恩、拔、副贡一等二卷，二等三卷，三等三卷；岁贡一等二卷，二等二卷；捐贡监生一等二十四卷，二等四十五卷。共拟取八十一卷。至誊录八卷，由正途出身者文理尚属通顺，捐纳出身者字画亦尚端楷，均堪录取。谨将贡监考职前列试卷十本并四库馆议叙誊录试卷八本一并恭呈御览，恭候命下，臣等会同该御史等拆号填榜，交与吏部照例办理。

为此，谨奏。

著将贡监考职录取滥额之礼部尚书德保等议处事上谕

乾隆五十三年六月初二日

乾隆五十三年六月初二日内阁奉上谕：据德保等奏，阅看贡监考职试卷共五百零八卷，拟取八十一卷。等语。此次考职贡监生，比上届四百七十六卷虽多三十余人，而上届仅取六十八卷，核计每七卷内取中一卷，若照此额数录取，止应取七十二名，何以多取九卷，殊属有心干誉。此皆德保迂懦无能，一味沽名市惠，以致较前溢额。考职系三年一举，似此每次加增，其将何所底止耶？除现在已取之八十一卷免其裁汰外，嗣后不得援以为例。德保、李绶、吉梦熊并著交部察议。钦此。

工部尚书金简等为酌拟报捐贡监职衔防弊数条事奏折

乾隆五十三年六月二十八日

工部尚书兼署户部尚书事务臣金简等谨奏，为奏明请旨事。

本年六月初一日奉上谕：巴延三奏据署兴安府知府之同知嵒光拿获包捐监生伪造印信之王念修定拟斩监候一折，已批交该部议奏，并令署知府嵒光送部引见矣。从前甘省报捐监生因王亶望通同属员舞弊营私，致多事棍徒乘机代揽，遂有包捐情弊。今皆系在部报捐贡监，岂得复有代为包办名目。贡监为士子进身之阶，必得身家清白方准厕列衣冠。该生等如有志向上者，自应亲身赴部呈明履历，候批准报捐，方为正理。若该生等因道远盘费不敷，不能亲身到部，即可毋庸报捐，国家帑藏充盈，又岂藉伊等些微捐项为耶？嗣后如有在部具呈请捐贡监者，该部应验明年貌，实系亲身赴部身家清白之人，始准报捐。若本人并未赴部倩人代捐者，概行饬禁，以杜匪徒诬骗包揽情弊。其有在部具呈报捐职衔者，亦著照此办理。著为令。钦此。钦遵。抄出到部。仰见我皇上睿虑周详慎重名器之至意。当即恭录上谕，通行各直省督抚、府尹，并出示晓谕遵照办理。

伏查本年届戊申科乡试之期，该生等志切观光，报捐贡监应试者纷集，且奉新例贡监录科，钦派王大臣考试，为时无几。其现在亲身赴部报捐者，除一面取具同乡京官印结验明年貌准其报捐外。至其余报捐贡监、职衔人等，现在钦奉谕旨，饬令亲身赴部报捐，嗣后揽捐、假照等弊不禁自除。惟是其中情形不一，臣等公同酌议，拟立数条，以严防范而广皇仁，俾得永远遵循，奉行无滞。谨按款开列，恭呈御览。

一、平人初捐贡监、职衔，应亲身赴部具呈。但是否委系亲身，臣部难以稽考，应令取具同乡京官印结，声明委系亲身字样，粘呈投递。其京官内如七品以下等官向无印信者，准其照向例出具图结，加具印结，由臣等验看年貌相符，发司查办，仍于捐后行文原籍地方官，照例造具身家清白清册送部。

一、廪、增、附、武生等原有学册可稽，伊等每年俱应本籍岁科考试，且廪生有童试保考之责，应令其亲信弟兄叔侄或至亲代为取结报捐，仍于捐后将廪、增、附生移查礼部，武生移查兵部，核对学册咨复。

一、从前已捐贡监并微末职衔、已未满典吏以及中式举人、进士、恩、拔、岁、副，俱有官册可凭，捐册可验，向例由监捐贡，由贡捐职，由微职加捐，俱将原捐执照缴销，较平人初捐自有区别，应仍俟报捐后行知本籍。

一、京外现任人员、随任子弟，自系身家清白之人，或随外任帮办公务，或父兄在京供职藉其子侄经营家务，自与平人报捐者不同，应仍俟报捐后行知本籍。

一、八旗满洲、蒙古、汉军，原系在京居住无难亲身递呈。至驻防人等，向系捐后由在京佐领造册报部，应仍照旧办理。

一、独子及亲老之人，虽有次丁年幼无知者理应朝夕侍奉，又丁忧人等例应在籍守制，向来报捐者于原呈内声明现在丁忧字样。嗣后此项人等应令专差妥仆，或转烦至亲，赴部报捐，仍取具同乡京官印结，声明系独子等字样，捐后行文原籍地方官造册报部。

一、老幼及有疾之人，难以长途跋涉，向例报捐贡监、职衔，并不拘定年岁，嗣后应将年六十岁以上、十六岁以下，以及有疾之人，令其父兄叔伯子侄或至亲代为取结报捐，仍于印结内声明，捐后行文地方官造册报部。

以上各条，谨就臣等意见所及，是否有当，伏候训示遵行。谨奏请旨。

协办大学士福康安等遵旨回京审理黄寿龄考到贡监婪索银两案事奏折

乾隆五十三年九月十六日

臣福、臣董跪奏，为奏闻事。

窃御史祝德麟参奏司业黄寿龄于考到时非钱不取以致士怨沸腾一案，奉旨将黄寿龄解任交刑部看守，特派臣等回京审办，遵即起身，昼夜兼行，于十四日清晨到京。先传祝德麟到案，将所奉谕旨明白宣示，并谕以此事案情重大，既经劾参，即当彻底严办，从重治罪，若竟毫无指实，只以风闻之言藉词诿卸，即有诬告反坐之罪。祝德麟始犹含糊其词，惟言得自风闻，并无指实。及臣等反复开导，始据称，同族编修祝堃有海宁同乡监生杨朝佐、副贡生陈承曾到京，资斧缺乏，现有考到尚须设措贽仪。又，我妻舅监生李翱内侄李廷瑚于考到时各送黄寿龄贽仪四两，送贽仪后李廷瑚因病未能赴试，李翱考到，录取伊二人，已往河南彰德府探亲。现有经手送银之家人杨升在京，可以传询。此外还有何人馈送，实在不能指出。等语。当提黄寿龄严切讯究。今将本年考到如何向应试诸生婪索银两、得受若干，逐一据实供吐。据供，国子监考到向系满汉司业轮期分考，本年满司业纳麟宝出差，所以我一人办理考到之事。我并不敢丝毫苟且，只因考试时场规甚严，不取的士子未免抱怨，造作浮言，或未可定。其实祝德麟所参的事并无影响。等语。臣等以士子赴监考到人数较多，若果黄寿龄秉公考校一无沾染，何以祝德麟指名参劾，并有非钱不取、苞苴满户、物议蜂起之语。况该御史现已指出杨朝佐等四人，即应从此跟究。再三驳诘，据供，我考到时俱是凭文录取，并不敢未考之前婪索。祝德麟指出之贡监生杨朝佐、陈承曾、李翱、李廷瑚等四人实未谋面，亦无得过他银两的事。间有考取前列于发案后到门拜认师生的，记得有监生徐予嘉一人曾经备送过贽仪四两，此外实无人送过。况且贡监考到后，定例由总理堂官及祭酒录科分别去取，方准入场。我系司业，只管考到之事，诸生岂肯相率馈送呢。等语。臣等伏查，祝德麟既经指出馈送之人，则所奏黄寿龄于考到时索取银两情弊不为无因，虽据黄寿龄只供于考后得受徐予嘉一人拜认师生贽仪，并未预先婪索银两，显系因人证未齐藉词抵赖。相应请旨，将黄寿龄革职拿问。一面传询祝德麟，并提监生杨朝佐，副贡生陈承曾、徐予嘉及监生李翱等送银家人杨升到案。三面质对，再严讯黄寿龄此外尚得何人银两，一并尽情供吐，毋任丝毫狡饰，以便从重定拟，严办示儆。惟祝德麟折内既有非钱不取之说，所知自必不止现在指出之杨朝佐等四人，而再三向祝德麟开导询问，并不能另有所指，只称黄寿龄收受贽仪我所知得真切者实只此四人。我揣度情形妄意其有钱方可录取，具折时遂失检点写入非钱不取字样，蒙询之下实觉指词过当。这就是我不是处。等语。核其所言情节，实属游移，必有不实不尽之处。况事关考试营求，罪名出入较重，自应确加跟讯，按名究办。

再，祝德麟折内所称国子监考试除刘墉、邹炳泰外，其余各堂官则来者不拒、去者不追之处，询之该御史，亦坚称不能指实。事关科场舞弊，未便稍涉颠预，现在逐加详讯，务期水落石出，以成信谳。

至刘墉、吉善在京何以毫无觉察，竟同聋聩，实难辞咎，遵旨于审明时一并查办。其馈送银两

之李翱、李廷瑚业经飞咨河南巡抚飭拿务获，解京归案办理。

所有臣等到京日期及审讯大概情形，谨缮折先行驰奏，伏乞皇上睿鉴。谨奏。

乾隆五十三年九月十六日奉朱批：即有谕旨。钦此。

著福康安等开导贡监生供吐严究黄寿龄婪索银两案事上谕

乾隆五十三年九月十六日

大学士·伯和字寄协办大学士·公福、尚书董，乾隆五十三年九月十六日奉上谕：昨据福康安等奏黄寿龄考到婪索银两一案，传讯御史祝德麟，惟供指贡监生杨朝佐、李翱等四人，而于黄寿龄非钱不取实据不肯和盘托出，已降旨将黄寿龄革职拿问，祝德麟一并解任，交福康安等复加严鞫。并向杨朝佐等反复开导，晓以利害，使之供出实情矣。此事前据祝德麟奏黄寿龄考到时非钱不取，苞苴满户，物议蜂起，言之凿凿。乃经福康安等传旨询问时，又复首鼠两端，仅举出杨朝佐等四人，显属自相矛盾，似此进退无据其情可恶。现已将祝德麟解任质审，福康安等应再向其严切跟究，务令黄寿龄婪索列款一一指出，勿任含混隐饰。如祝德麟始终不吐，福康安等当遵昨降谕旨，向杨朝佐等四人愷切开导，以科场舞弊与受同罪，伊等馈送黄寿龄之处业经祝德麟指出，已干重戾，若及早将同考监生馈送黄寿龄实据尽情供吐，其罪尚可末减。即如柴大纪案内，外委林长春营求拔补法无可贷，念其到案即行供出，且所送银两究由柴大纪婪索所致，是以宽其一线，未经予勾。该生监等果能彼此互相举发，则伊等所送银两亦由黄寿龄婪索所致，自可仰邀末减之处向该生监明切晓喻，伊等自必共知利害，速吐实情，众证确凿，黄寿龄亦无从抵赖，可成信讞也。将此再行传谕知之。钦此。遵旨寄信前来。

协办大学士福康安等为申明定拟黄寿龄考到贡监婪索银两案事奏折

乾隆五十三年九月十八日

臣福、臣董奏，为遵旨严审定拟具奏事。

窃御史祝德麟参奏国子监司业黄寿龄专司考到非钱不取一案，奉旨派臣等回京审办，并屡奉谕旨令查核所奏情节，逐一指实，澈底严办，业将节次审讯缘由奏蒙圣鉴在案。臣等连日提集犯证，悉心研究，缘贡监生例系国子监录送乡试，凡来京应试本未在监肄业者，先由司业考到，初次不取，仍准二三次复考，向俱全数取送祭酒录科，并无遗落。诸生于录送后拜认师生，间有致送贽仪及香料、纸扇、册页、手卷等物，亦属相沿陋习。本年满司业纳麟宝出差，考到之事系黄寿龄一人专办。初次被遗者较多，各生未免抱怨，及考到之后有馈送贽仪者，黄寿龄又俱收受，以致啧有烦言。现经祝德麟指出，伊妻舅监生李翱、内侄监生李廷瑚各送黄寿龄贽仪四两，伊二人已往河南，现有家人杨升可证。又同乡贡生杨朝佐、陈承曾来京考到后，听得编修祝瑩言及，该生等资斧缺乏，尚须设措贽仪。提讯杨升，供认亲见李翱、李廷瑚剪夹银两，每人各包银四两亲自送去。杨朝佐、陈承曾亦各送贽仪银一两。询之黄寿龄，自认收受，并供出监生徐予嘉送过贽仪四两，俱系于考到后送去。是实。臣等查黄寿龄身为司业，得受士子银两，自系事前贿嘱，必非于考拔始行送给，未便以贽见陋例为词，任其掩饰。且祝德麟原奏有非钱不取之说，所得银两断不止此数人。恐有避重就轻不实不尽情事，复向黄寿龄层层驳诘，并欲刑吓。复据供出，送过贽仪诸生尚有贡监生范三元、亢克慎、潘容、温籍、陈方骏、吴聘、冯德浚、杨观成、毕所许、李琅、谢曜、尤逢辰、尤兴让、谢宝圭、章群、韦廷征、姚棠、吴梦贻、顾焘、吴恩崇、刘埜、姚师适等二十二人，俱于录取后陆续到门投送贽仪，自一两至四两不等，共得银六十二两，实非在考前婪索。但究系一面之词，不足凭信。且查阅所取试卷，有赏沅、沈惟二名文理草率滥行录取情弊，显然即应从严跟究。

复据黄寿龄供，赏沅原在编修章宗瀛家受业，上年四月内章宗瀛告假回籍，彼时我尚做编修，章宗瀛将赏沅送与我批改文字，原是我的门生。沈惟一名是素常相熟之人，所以考到时都将就取了。后来到门拜谢，赏沅送银四两，沈惟也送银二两。这是我看顾情面，并非预先贿嘱。等语。除沈惟业已出京尚未到案，现在提到赏沅，供词亦俱符合。质之章宗瀛，亦言赏沅实系于上年四月内送往黄寿龄处受业，与黄寿龄所供年月情节均属相符，是黄寿龄虽无事前婪索情弊，而徇私滥取之处已有确据。其曾经馈送贽仪诸生，已将现在京中之冯德浚、章群、韦廷征、谢曜、范三元、吴恩崇、顾焘、刘埏、陈方骏陆续传到隔别研讯。金供，系于考取后前往拜见老师，各送贽仪一两至四两不等，平日并无来往，实非考前馈送。供出银数，与黄寿龄所开符合。遵旨将杨朝佐、陈承曾及冯德浚等，谕以尔等同试各生内尚有何人馈送必无不知之理，若能互相指出，尚可稍宽其罪，否则与受同科，断难末减，恺切开导。据杨朝佐等坚称，实在并无闻见，若果知有馈送之人，今蒙如此开导，岂肯代人隐瞒，自取咎戾。等语。

臣等又将考到各试卷逐一磨勘，除赏沅、沈惟二卷外，尚无滥取之卷。并分派妥干番役密加访察，各处考到贡监于录取后有到门拜见馈送者，亦有竟不往见者，委无于考前馈送情弊。祝德麟所奏非钱不取之说，实属过当，自不无挟私攻讦情事。及询之黄寿龄，据供，上年与祝德麟在文渊阁校阅四库全书内翻译同在一案，祝德麟自以科分较深，令我查对字档，取送书册，我心怀不甘，不肯服他使唤。如此数次，祝德麟大有愠意。等语。质之祝德麟，亦称原有此事，但所言实系小嫌，彼此并未争闹，而参奏之事究属不为无因。惟祝德麟原奏内所称情节尚多不实不尽，传询之下又复含混游移，惟自认得自风闻，措词过当，不能一一指实。再三开导，令其逐一登答究系闻自何人。据称，御史曹锡宝在署内曾论及黄寿龄声名不好，王念孙在旁亦闻此言。随传曹锡宝等先后询问，俱称黄寿龄声名不好之处系祝德麟先行说起。察其情词，尚属真切。及与祝德麟当面质对，推卸良久，始据供称，我于七月内已有心参劾黄寿龄，欲采舆论，在署内与曹锡宝、王念孙谈论，实是我先说起的。前日记忆不清，故尔混供。至折内非钱不取一节，因黄寿龄头次考到遗落甚多，二次又都取了，岂必二次皆优于初次，想来是留空叫人馈送。又闻得编修吴敬舆说考到落卷中有圈点批语甚好之语，所以心疑所取者皆系有钱，不取者自系无钱送给，其实真知灼见者，除杨朝佐四人外，不敢妄指。等语。质之吴敬舆，据称六月内祝德麟曾问我黄寿龄考到不公，你听得外间议论如何。我并未闻外间有何议论，因祝德麟是我老师不便驳正，他就随口答应说想来文章好的也未必全取。原是一时周旋老师之辞。至卷子上的批点，我非国子监官，如何能看见，想是祝德麟错会意了。等语。臣等将不取试卷全行吊查，并无批好之卷，所言亦属于虚。

又折内寒峻空蓑典质馈送一节，讯据祝德麟供称，我闻祝堃说杨朝佐、陈承曾资斧缺乏现欲设措贽仪设措之言，自然非当即借，折内所言借资即是此意。其实别无所闻。等语。又，折内称此外堂官则来者不拒、去者不追一节。据祝德麟供称，吉善、纳麟宝虽无陋劣声名，亦不听见人说诸生不敢馈送，心内疑此二人尚可通融，是以将来者不拒、去者不追二语写入，我实不能指出证据。今遽以约略之言具奏，这是我陈奏不实。等语。询之传到诸生，金称满汉祭酒处不但没有送过贽见，亦未到门拜望。反复研讯，众供如一。臣等伏查，祝德麟参奏黄寿龄考到时非钱不取、苞苴满户、物议蜂起，言之凿凿，而于婪索银两若干、何人馈送之处并未列款具奏。及传旨再三询问，仅举杨朝佐等四人，不能别有所指，惟援引他人哓哓渎辩，而所引作证之人三面质对，又属附会捏饰。况考到系六七月间之事，彼时若果有大弊，即应查实参劾，何以迟逾数月，始以相沿陋例敷衍陈奏。向其再三驳诘，祝德麟惟有自认冒昧恳求治罪，不能复行置辩。查例载，官吏有事过之后而受财不枉断者，准不枉法论，不枉法赃，各主通算，折半科罪三十两，杖九十。各等语。今黄寿龄于考到贡监录取后，得受贽仪银六十二两，虽系相沿陋例，并非事前听从贿嘱，而士子考到后尚须录科，

亦无关入场去取。但将受业门生及熟识之人瞻徇录取，又复收受贽仪，当此更定考试条例之时，屡蒙谕旨训饬，尚敢相沿陋习，实属猥鄙，应以事后受财科断，通算所得贽仪银六十二两折半银三十一两，黄寿龄合照不枉法赃三十两杖九十例，杖九十折责三十五板。贡监生徐予嘉等二十七名于考后各送贽仪，虽有不合，姑念沿习师生陋例馈送贽见，并非考前行贿；赏沅、沈惟系黄寿龄徇私滥取，亦无营求嘱托情弊。今诸生于乡试之后多已出京回籍，亦不值牵引多人纷纷查办，可否免其置议之处，出自圣恩。祝德麟于参劾黄寿龄虽属有因，但并不列款指参，乃摭拾浮言，希图耸听，传旨询问时仍敢徇隐游移，不肯和盘托出，一味含混。及逐条指出驳诘，妄引多人作证，推诿捏饰，所奏情节多涉虚诬。伏思御史有言事之责，遇有营求等弊，自应据实劾参。今祝德麟折内过甚其词，欲以建白沽名，又复畏首畏尾，进退失据，诚如圣谕，实为明季台谏劣习之尤。相应请旨，将祝德麟革职，以为取巧见长者戒。曹锡宝、王念孙皆系言官，既闻祝德麟在公署谈及黄寿龄声名不好，即当查实参奏，乃竟缄默不言，亦有不合，应一并交部议处。刘墉管理国子监事务，吉善系国子监祭酒，于黄寿龄得受贽仪之处何至毫无见闻。向刘墉等询问，据刘墉等伏地碰头口称，事前既不能防范事，后又毫无觉察，实属罪无可逭，只求皇上交部治罪。等语。相应一并参奏请旨，将刘墉、吉善交部议处。

再，查国子监考试文卷向俱携至私宅阅看，而考到之事系司业专管，录科系祭酒专管，并不互相阅看，实不足防杜弊端。请嗣后国子监考试，除俊秀监生录科仍遵新例由钦派大臣阅看外，其余录科考到试卷俱令管理国子监大臣及祭酒、司业等，公同在署校阅，不准携回私宅，以昭慎重。至考到时一次不取仍准再考之例，本系重复，并请嗣后贡监诸生来京应试者只许考到一次，不取者不得再行预考。合并声明。

所有审拟缘由，是否有当，伏乞皇上睿鉴训示。谨奏。

军机处为黄寿龄考到贡监婪索银两两案涉案贡监不必送京质讯事致河南巡抚咨文

乾隆五十三年九月十九日

办理军机处为飞咨事。

所有御史祝德麟参奏国子监司业黄寿龄一案内贡监生李翱、李廷珣二名，有应行传讯之处，业经刑部行文河南彰德府，将该贡监查送到京，以便质讯在案。现在此案已经讯明，毋庸该生等质讯，相应飞咨贵抚，即行遵照，不必再将该贡监李翱、李廷珣送京。特此知会。右咨河南巡抚。

著江苏等六省三科以前由俊秀报捐贡监生中式举人來年会试等事上谕

乾隆五十三年十一月二十三日

乾隆五十三年十一月二十三日内阁奉上谕：前定科场条例，令各省中式举人复试。朕念各省人数众多，难以遍行复试，已降旨俟明岁会试发榜后，将中式者复考一次，未经中式者听其各回本籍。但前此吴省钦条奏丙午以前三科由俊秀报捐贡监中式举人籍隶苏扬广东山西者复试一折，业经大学士、九卿议准，仍应照旧办理。惟吴省钦所指四处，尚未周到，著将江苏、安徽、江西、浙江、广东、山西六省三科以前，由俊秀报捐贡监生中式举人者，俱于来年会试前，在圆明园正大光明殿先行复试，再准入场。如遇有事故未能来京应试者，著照原议下科补行复试。此六省未经复试之人，不得赴会场考试，亦不准赴吏部截取銓选。钦此。

著旧科举人均准会试毋庸复试俊秀贡监中式举人事上谕

乾隆五十四年二月二十九日

乾隆五十四年二月二十九日内阁奉上谕：前经大学士、九卿议复顺天府尹吴省钦条奏请将江

苏、安徽、江西、浙江、广东、山西六省丙午以前三科，由俊秀贡监生中式举人俱行复试。今据礼部查明，此三科应行复试者共七十余名，除丁忧事故外，现在到部四十五名。因派大臣复加考试，内万应馨等四十三卷文理俱皆清顺，惟王丕融、薛载熙两卷诗句粗率，而四书文尚无大疵。朕思举人复试，必须于揭晓后举行，方可以鉴别优劣。其中如有文理纰缪者，亦即可调验原卷，互相核对，情弊无难立见。若将旧科举子补行复试，则隔日既久，举业荒疏，亦在所难免。且此等举子皆系上数次会试落第之人，其文艺平常可知。如果所业不进，即此次会试仍难入彀，是以上年秋间曾明降谕旨，将乡试复试之例停止，惟于会试中式后举行复试。兹因吴省钦条奏于未经会试以前将上三科由俊秀中式者先加考试，殊觉多此一举。所有此次复试之举人万应馨四十三名，均著准其会试，即王丕融 [融]、薛载熙二名，诗句虽属粗率，亦著免其停科，一体准予会试，即不得中，彼亦无所怨。将来会试榜发后，再将榜内各省中式者通行严加复试。倘有文理不通与原卷迥殊及原卷本有疵类者，其弊不在内帘，即在外帘，不难逐一跟究，从严办理。其或有文风平常省分就卷录取者，亦当将该省落卷调齐比较，如落卷文理转比中卷为优，是考官衡鉴不公，亦应查究。至此次复试不到之举人，除患病等项事故，恐有规避者，仍著以下三科为限补行复试外，其查系丁忧并非托故不到者概毋庸补行复试。钦此。

著贡监生员等自甘禁律从重照依平人之例问拟事上谕

乾隆五十六年五月十一日

乾隆五十六年五月十一日内阁奉上谕：刑部议复江苏省拿获盐犯谢鸿仪分别治罪一折，案内孙元梅以监生窝顿私盐至四千斤以上，恃符庇匪，未便因其系属监生，即得免其为奴，应将该犯改发黑龙江给披甲人为奴。等语。所奏是，已依议行矣。该部议从重，原系遵朕谕令改者。向来监生犯事罪应发遣者，例只发往当差，与平人为奴者不同，定例本未允协。监生捐衔者多即只为贡监，既名列成均，理宜怀刑自爱，若以定例从宽，辄敢恃符玩法，较之无知愚民，尤为不肖。且既已犯罪斥革，即与平人无异，岂得因其原属监生，即免为奴，致滋轻纵。嗣后监生犯事有似此情罪较重者，俱照平人一律办理。至在籍候选之进士、举人及其余举贡生员，皆属身列衣冠，名登黉序，若能安分守法，立品读书，为小民倡率，原当加以体貌，别于齐民。倘恃符纵肆，自蹈刑宪，是即不知君子怀刑之意，为士林败类，免其加倍治罪已属法外施仁，复转较平人从轻定拟，何以明刑弼教？嗣后进士、举贡生员等只系寻常过犯不致行止败检，仍照旧例办理。若系党恶窝匪卑污下贱者，著俱照平人之例问拟，以示惩戒。钦此。

江南道监察御史曹锡龄为请更定贡监生考职之期以昭慎重事奏折

乾隆五十六年十二月初三日

江南道监察御史臣曹锡龄跪奏，为请更定贡监生考职之期，以昭慎重事。

钦惟我皇上寿考作人，至周至悉，每遇顺天乡试之年，准各直省贡监生于场前考职一次，其入选者各照等第分别给与职衔，注册候选。伏查此项考试，原为乡试而设，而旧例相沿，虽不应乡试之贡监生亦得一概与考。其中不尽通文之士，恐种种弊端难保必无。臣愚以为，与其场前增此一考多费关防，不若改归乡试闱中，就南北皿荐卷落卷内秉公酌量选取，即于揭晓之前凭红号阅定，无庸另行拆号密封，致滋弊窦。庶于成例无碍而防范更属周详，似亦慎重考试之一道。

明年即系壬子科乡试之期，臣谨遵例先期陈请，是否可采，伏乞皇上敕部议复施行。谨奏。

乾隆五十六年十二月初三日奉朱批：大学士、九卿议奏。钦此。

安徽学政秦潮为奉家应试贡监生员遵照新例回避事奏折

乾隆五十七年四月二十日

安徽学政臣秦潮跪奏，为奏明遵照新例回避应试事。

臣查乾隆五十三年礼部议准安徽布政司陈步瀛条奏，江苏人员现任安徽道府直隶州以上者子弟亲族概不准应江南乡试，通行遵照在案。原议内恐本管上司遇所属州县调取入帘，或有关通迎合情弊，立法至为严密，而于奉差人员未经议及。但臣籍隶江苏，蒙恩简任安徽学政，三年中安徽州县因公接见者甚多，秋间办理遗才又须亲至江宁省城录送，事涉嫌疑，自应将臣本家应江南乡试之贡监生员不论亲疏远近，遵照地方官之例概令回避。则功令既昭画一，臣亦可安心办公。

谨恭折奏闻，伏乞皇上睿鉴。臣谨奏。

（朱批）：该部知道。

著刑部堂官审拟国子监典簿厅遗失贡监生文书印结案事上谕

乾隆五十八年六月二十三日

大学士·伯和字寄刑部堂官，乾隆五十八年六月二十三日奉上谕：据国子监参奏典簿厅存贮己酉科乡试贡监生文书印结一千余件全行失去，请将典簿周炎先行解任，并该厅书吏交刑部严讯究拟。等语。已降旨将周炎解任交该部究讯矣。此项文书印结既失去一千余件，何以又查出五百九十余件。且据禀称于上年十月内被窃，何以直至此时始行呈报。其中种种疑窦，必另有别情及盗卖等事，不可不逐一跟究。著传谕刑部堂官务须详讯确情定拟具奏。至该厅失去文书一千余件之多，又不即时呈报，该堂官等漫无觉察，亦难辞咎，俟审明定案后，再著交部议处。将此谕令知之。钦此。

著后世子孙勿开捐例仅惟贡监一途事上谕

乾隆五十八年十一月二十日

乾隆五十八年十一月二十日内阁奉上谕：朕自临御以来，惠爱黎元，加恩海宇，凡普免天下钱粮四次，普免漕粮二次，此外偶遇水旱偏灾随时蠲免赈恤者又不一而足。敬念圣祖仁皇帝御极六十年普免钱粮一次、漕粮一次，稽诸史册，已为亘古所未有。而朕继承统绪于重熙累洽之后，维日孜孜，无刻不以民依为念，蠲免次数视康熙年间更有加增。此皆由国家承平日久，生齿益繁，人君代天养民允宜，渥沛恩膏，俾闾阎共臻乐利，方为子惠元元之道。我子孙缙膺大统，亦当以朕之心为心，爱养斯民，推恩行庆，若能频施旷典，视朕有加，实我大清国亿万年无疆之祚。若靳惜恩膏有所弗逮，即非所以善继善述。设彼时大臣中或以经费有常储蓄宜裕为词者，似为国用起见，易于动听，而不知民为邦本，为民正所以为国，其言断不可听从也。至为治之要，首在用人，而人才究以正途为重。前因军需、河务支用浩繁曾暂开捐例，原属一时权宜之计，不久即行停止。迄今已阅二十余年，而府库充盈，并不因捐例停止稍形支绌。铨选既无壅滞人才，亦得奋兴可见。捐纳一事竟当不必举行，此不特慎重名器，并以嘉惠士林，我子孙亦应奉以为法，倘复有奏请开捐者，即为言利之臣，更当斥而勿用。惟贡监一途，乃众所愿，弗占正途，不过给予顶戴，无碍铨政，亦仿古人纳粟之意，事尚可行，是皆用人爱民之大经大法。著将此旨敬谨存记，俾我世世子孙遵循弗替，以期永臻郅治。钦此。

为元旦颁诏酌拟贡监生免坐监一月等二十四条恩免事项事奏折

乾隆六十年十二月初五日

恭照丙辰元旦应行颁发恩诏，臣等谨将撰拟诏文缮写清汉呈览。至一切加恩事宜，臣等谨酌拟

二十四条进呈恭候钦定，届期照例颁发。谨奏。

附件 酌拟二十四条恩赐事项清单

- 一、在京在外诸王以下至公等以上俱加恩赐。
- 一、内外自公主以下至格格各加恩赐。
- 一、内外满汉文武大小官员俱加一级。
- 一、内外大小各官，除各以现在品级已得封赠外，凡升级及改任者，著照新衔封赠。
- 一、文官在京四品以上、在外三品以上，武官在京在外二品以上，照现任品级各荫一子入监读书。
- 一、内外文职自四品以下、武职自三品以下，降革留任及住俸罚俸处分，准其开复。
- 一、会试额数俟礼部临期奏明人数请旨酌量广额，乡试大省加三十名，次省加二十名，小省加十名，满洲、蒙古加六名，汉军加三名。
- 一、各直省入学额数，大学加七名，中学加五名，小学加三名。
- 一、国子监贡监生及各官学教习免坐监一月。
- 一、各直省儒学，无论府州县卫，俱于本年以正贡作恩贡，次贡作岁贡。
- 一、每府州县卫各举孝廉方正，暂赐以六品顶带荣身，以备诏用。务期采访真确，毋得滥举。
- 一、历代帝王陵寝、孔子阙里及五岳四渎等祀应遣官致祭者，照旧例举行。
- 一、旗营官兵有因出征及被灾借支俸饷者，免其扣还。
- 一、满汉兵丁曾经效力行间因被伤年老闲住者，除例得优恤外，查明酌加恩赉。
- 一、各直省有同堂五世及亲见七代者，除例赏匾额外，查明各加恩赉。
- 一、天下之本农为重，各府州县卫果有勤于耕种务本力作者，地方官不时加奖，以示鼓励。
- 一、年老之人自古所重，满汉七十以上，除家奴外，给与品级之处该部查议具奏。
- 一、除五旗包衣佐领下披甲人等不赏外，八旗满洲蒙古汉军护军、披甲人、炮手、步军各赏一月钱粮。
- 一、军民年七十以上者，许一丁侍养，免其杂派差役；八十以上者，给与绢一匹、棉一斤、米一石、肉十斤；九十以上者倍之。
- 一、各处养济院所有鳏寡孤独及残疾无告之人，有司留心以时养赡，毋致失所。
- 一、官吏兵民人等有犯除谋反叛逆、子孙谋杀祖父母父母、内乱、妻妾杀夫、奴婢杀家长、杀一家非死罪三人、采生折割人、谋杀故杀真正人命、蛊毒魇魅毒药杀人、强盗妖言十恶等真正死罪不赦外，军机获罪、隐匿逃人亦不赦外，其余自嘉庆元年正月初一日以前已发觉未发觉、已结未结者咸赦除之，有以赦前事告讐者以其罪罪之。
- 一、各省军流人犯查明到配三年实在安静守法及年逾七十者，释放回籍。
- 一、各旗籍内务府并五旗包衣人等凡侵贪挪移一切赔罚应追银两，实系本人家产尽绝者，查明准与豁免。其分赔、代赔以及牵连赔者，一概豁免。
- 一、凡官员因公赔罚等项而其子孙又代祖父著赔者，查明宽免。

（责任编辑 赵增越）